

VADGERI D̄GOKUNYORA

KWAJOHANI

1 Pakutanga walapo Izwi, nelzwi waia naMhari, nelzwi waia Mhari. **2** Uyu walapo pakutanga naMhari. **3** Ziro zeshe zakasikwa ndiye; nangepabanzi pake ingapasinna ciro cakasikwa kweizo zakasikwa. **4** Kwaiapo kupona kwari, nokupona ukwo kwai kujeka kwavanhu. **5** Nokujeka kunojeka mucidima; necidima acizi kuku-nyisa. **6** Kwakauya munhu, wakatumna ndiMhari, zina rake rala Johani. **7** Uwo wakauya kuita capupu, kuti apupure ngokujeka, kuti vanhu veshe vatende ndiye. **8** Iye wainga asiriye kujeka ukwo akadi, asi wakatumna kuti apupure

ngokujeka ukwo. 9 Kujeka ukwo kwaia kujeka kwecakwadi, ukwo kuojekisa vanhu veshe vanoba-rwa munyika. 10 Uyu waia munyika, nenyika yakasikwa ndiye, nenyika aizi kumuzia. 11 Wakauya kwezake, nevake avazi kumuashira. 12 Asi kwavari veshe vakamuashira, wakavapa simba rokuti vaite vana vaMhari, kwavari avo vanotenda zina rake: 13 Avo vasikazi kubarwa ngengazi, kunyazi ngokuemura kwenyama, kunyazi ngokuemura kwomunhu, asi vakabarwa ndiMhari. 14 Ne-izwi wakaitwa muiri, wakagara pakati pedu, nesu takaringira utende hwake, utende huri hwouwo wakabarwa ega ndiBaba, akazara ngenyasha negwinyiso. 15 Johani wakaita capupu ndiye, akadaidzira, eciti, Uyu ndiye wendakaereketa ndiye, kuti, Uwo unouya sure kwangu, waindoapo pamberi pangu, ngokuti waindoapo ndisati ndaapo. 16 Ngokuti isisu teshe takaashira kwezakawanda zake, nenyasha ngenyasha. 17 Ngokuti zironzo zakahinwa kupotya ndi-Mosi, asi nyasha negwinyiso zakapo ndiye Jesu Kristu. 18 Akuna wakamboona Mhari nokuti ngouri mukuwo; uwo wakabarwa ega ari-Mukororo iye unogara paditi pa-Baba, ndiye wakamupangidzira. 19 Nenci ndico capupu caJohani, apo vaJuda vatuma kwaari vapristi nevaRevi kubva Jerusarema, kumubvunza kuti, Uriani iwewe? 20 Naye wakatenda, aazi, kukanidza; wakatenda, eciti, Inini andiri Kristu akadi. 21 Navo vakamubvunza, Ndizo uriani? Uri Erija here? Naye wakapingura, Andiriye akadi. Uri uwo muprofeti

here? Naye wakapingura, Haiwa. 22 Ndizo vakati kwaari, Uriani? kuti tiwone cokupingura avo vakatituma. Unotinyi iwewe ngokwako? 23 Wakati, Ndiri izwi roundaidzira mushango, kuti, Ruramisai njira yaMambo, kudai ngezakarozza Isaya muprofeti. 24 Naavo vakatumna vaia vevaFarisi. 25 Navo vakamubvunza, vakati kwaari, Ndizo unobapatidzirenyi kudai usiriye Kristu, nokuti Erija, nokuti uwo muprofeti. 26 Johani wakavapingura, eciti, Inini ndinobapatidza mumvura: asi pakati penyanoema uwo womusikazi, 27 Ndiye uwo unouya sure kwangu, wakatsanangurwa pamberi pangu; uwo wendisikasisi inini kuti ndisunungure rusinga rwegwada rake. 28 Izi zakaitika muBetabara seri kweJordani, apo paaibapatidza Johani.

29 Necimangwani aona Jesu eciuya kwaari, akati, Ringirai, Kahwai kaMhari kanodusa kushaisha kwenyika! 30 Uyu ndiye wendakaereketa ndiye, kuti, Sure kwangu kunozouya munhu uwo wakatsanangurwa pamberi pangu, ngokuti waia pamberi pangu. 31 Neni inga ndisikamuzii, asi kwegu kuti unozopangidzirwa kuwaIsraeri, saka ngendaa iyi ndakauya ndecibapatidza mumvura. 32 NaJohani wakaita capupu, eciti, ndakaona Mjeya wecidzaka kubva mudenga unonga njia, ukagara padera pake. 33 Neni inga ndisikamuzii; asi iye wakandituma kuti ndibapatidze mumvura, iye uwo wakati kwendiri, Wounozone Mjeya wecidzaka nokugara padera pake, uwo ndiye unobapatidza ndiMjeya Wakacena. 34 Neni

ndakaona, ndakapupura kuti uyu ndiye Mukororo waMjari.

35 Necimangwanize Johani aingga akaema nevairi vevadzidzi vake. 36 Naapo amuona Jesu ecihamba, wakati, Ringirai, Kahwai kaMjari! 37 Uadzidzi avo vairi vakamuzwa eciereketa, vakamuteera Jesu. 38 Jesu wakakunukuka akavaona vecimuteera, akati kwaari, Munotsakenyi? Wakati kwaari, Rabi (ukwo kunoti ngokukumucwa, Mudzidzisi) unogara pari? 39 Wakati kwavari, Uyai muzoona. Ndizo vakauya vakaona apo paagara; navo vakagara naye ngezuya iro: ngokuti raia rinonga awa recigumi. 40 Umje wevairi avo vakamuzwa Johani eciereketa, oroomuteera, wala Andreu munuguna waSimoni Petro. 41 Iye wakatanga kutşaka mukoma wake aemho Simoni, akati kwaari, Tamuona Mesia (ukwo kunoti ngokukumucwa, Kristu.) 42 Naye wakamuunza kuna Jesu. Naapo Jesu amuringira wakati, Iwewe uri Simoni mukororo waJona; unozodaidzwa kuti Kefasi (ukwo kunoti ngokukumucwa, Ruware.)

43 Necimangwani wakado kenda Garire, akaona Firipu: naJesu wakati kwaari, Nditeere. 44 Zino Firipu walbva Betisaida, doropa revaigara Andreu naPetro. 45 Firipu wakatsaka Natanaeri, akati kwaari, Tamuona uwo waakanyora ndiye Mosi muzironzo nava-profeti, Jesu weNazareta, mukororo waJosefa. 46 Natanaeri wakati kwaari, Kungabwawo here ciro cakanaka muNazareta? Firipu wakati kwaari, Uya, uone. 47 Jesu wakaona Natanaeri eciuya kwaari, akati ndiye, Ringirai mu-

Israeri uwo ngegwinyiso usina kucengedza mukati mjake! 48 Natanaeri wakati kwaari, Wandii-ta maziirenyi? Jesu wakapingura, akati kwaari, Dgepamberi Firipu asati akudaidza uri pashi pomuonde, ndakakuona. 49 Natanaeri wakapingura, akati, Rabi, Iwewe uri Mukororo waMjari, uri Mambo waIsraeri. 50 Jesu wakapingura, akati kwaari, Dgokuti ndati kwouri, kuti, Ndakakuona uripashi pomuonde, unotenda here? Unozoona ziro zikuru kupinda izi. 51 Wakati kwaari, Zirokwazo, zirokwazo, ndinoti kwouri, Munozoona dengga rakabeuka, nenngirosi dzaMjari dzecikwira nokudzaka padera poMukororo womunhu.

2 Nangezuya recitatu kwaiapo mucado muKana reGarire, namai aJesu vaiapo. 2 NaJesu wakakokwawo nevadzidzi vake kumucado. 3 Naapo vini rapera, mai aJesu wakati kwaari, Avacina vini. 4 NaJesu wakati kwaari, Cinenyi ici kwendiri nokwouri, mai? awa rangu arisati raguma. 5 Mai ake akati kuvashandi, Kunyazi cinyini caanoronzwa kwomuri, itanyi. 6 Zino kwaiapo mabiya emapuwe matanhatu emvura kudai ngomuitiro wavaJuda wokushamba, rimje ngarimje rinoenera nhuvi mbiri kunyazi nhatu. 7 Jesu wakati kwavari, Zarisai mabiya ao nge-mvura. Navo vakaazarisa kuti penu. 8 Naye wakati kwavari, Ceral zino muende naro kune nhunge yomucado. Navo vakaenda naro. 9 Apo nhunge yomucado yaraira mvura iyo yakapindudzwa kuita vini, isikazi kuzia kuti rabva kuri (asi vashandi avo vakacera

mvura vaizia;) nhunge yomucado yakadaidza mukwambo. 10 Nayo yakati kwaari, Munhu weshe unobudisa kutanga vini rakanaka; naapo vanhu vamja kakurutu unobudisa iro risikazi kunasa kunaka: asi iwewe wakangwarira vini rakanasa kunaka metsa zino. 11 Uyu ndiwo wokutanga wemishamiso waakaita Jesu muKana reGarire, wakapangidzira pamhene utende hwake, nevadzidzi vake vakatenda kwaari.

12 Dgesure kweizi wakadzaka kuenda Kaperanaume, iye namai ake, nevanunjuna vake, nevadzidzi vake; navo vakagarapo mazuva asikazi kuwanda.

13 Nepasika revaJuda raia pedo, naJesu wakakwira Jerusarema. 14 Naye wakaona mutemperi avo vaitengisa nombe nehwa nenjia, nevaitenganisana mare vecigara: 15 Naapo ainga aita mushwapu wehwisha, wavadzinga veshe kubva mutemperi, veshe makwai nenombe; wakadurura pashi mare yavaitenganisana, akapinduridza matafura avo; 16 Naye wakati kune avo vaitengisa njia, Dusai izi ziro kubva pano; musaita mhatso yaBaba angu mhatso yokutengisira. 17 Nevadzidzi vake vakacerecedza kuti kwakanyorwa, kuti, Kutsamnjirira ngendaa yemhatso yako kucandipedza. 18 Ndizo vaJuda vakamupingura, vakati kwaari, Muonisonyi wounotipangidzira, kwecioneka kuti unoita izi ziro? 19 Jesu wakapingura, akati kwavari, Putsai iri temperi, nangemazuva matatu ndinozoriakaze. 20 Ndizo vaJuda vakati, Temperi iri rakaakiwa ngemakore ari makumi maro-

ngomuna namatanhatu, newe ungariaka here ngemazuva matatu? 21 Asi iye wakaereketa ngendaa yetemperi romuiri wake. 22 Ndizo apo amuswa kubva kwevakafa, vadzidzi vake vakacerecedza kuti wainga akaereketa ngeici, navo vakatenda zakanyorwa, nezwi iro raakaereketa Jesu.

23 Zino apo aia muJerusarema mupasika, mukudya, vazhinji vakatenda zina rake, veciona mishamiso yake yaakaita. 24 Asi Jesu aazi kudzhina kwavari, ngokuti iye waizia vanhu veshe, 25 Ze inga asikatami kuti munhu naumge apupurire kwaari ngendaa yomunhu; ngokuti iye waizia emene izo ziri mukati mnomunhu.

3 Zino kwaiapo munhu wevaFarisi, zina rake ndiNikodemusi, mutongi wevaJuda: 2 Uyu wakauya kwaari usiku wakati kwaari, Rabi, Tinozia kuti iwewe uri mudzidzisi wakabva kuna Mjari: ngokuti akuna naumge unesimba rokuita iyi mishamiso yonaita kwegu kuti Mjari anaye. 3 Jesu wakapingura, akati kwavari, Zirokwazo, zirokwazo, ndinoti kwouri, Kudai munhu asabarwa ngokwomudenga, aanga huoni umambo hwaMjari. 4 Nikodemusi wakati kwaari, Munhu ungaita mafarirwenyi apo aamusharuka? ungakona here kuti apotere ngokwecipiri mundani yamai ake, asarwe? 5 Jesu wakapingura, Zirokwazo, zirokwazo, ndinoti kwouri, kudai munhu asikabarwi ngemvura nangoMneya, aanasimba rokupotera muumambo hwaMjari. 6 Ukwo kunobarwa ngokwenyama kuri nyama; noukwo

kunobarwa ngokwoMjeya kuri mjeya. 7 Usashama ngokuti ndati kwouri, Kunotamika kuti ubarwe ngokwomudenga. 8 Dutu rinovuvuta perinoda, newe unozwa caungu caro, asi auzii perinobva, neperinoenda: zakadaro nokwavari veshe vanobarwa ngokwoMjeya. 9 Nikodemusi wakapingura, akati kwaari, Izi ziro zigaita maitirenyi? 10 Jesu wakapingura akati kwaari, Iwewe uri mudzidzisi waIsraeri nei zi auzizii here? 11 Zirokwazo, zirokwazo, ndinoti kwouri, tinoereketa cetinozia, nesu tinopupura ngeico cetakaona; nemgi amuashiri ucapupu hwedu. 12 Kudai ndamuronzera ziro zomunyika, nemgi musikazitendi, hino munozoita matenderenyi kudai ndecimuronzera ngeziro zomudenga? 13 Akuna naumje wakambokwira mudenga, kwega uwo wakadzaka kubva mudenga, eya Mukororo womunhu, uri mudenga. 14 Nokudai ndiMosi wakamirudza nyoka mushango, ngokudaro kunotamika kuti Mukororo womunhu amirudzwe: 15 Kuti nokunyati ndiani unomutenda aone kupona kusikaperi.

16 Ngokuti Mjari wakaida nyika kudai, wakahina Mukororo wake wakabarwa ari ega, kuti veshe vanomutenda vasafa, asi vaone kupona kusikaperi. 17 Ngokuti Mjari aazi kutuma Mukororo wake munyika kuti airashe nyika; asi kuti nyika iponeswe ndiye. 18 Uwo unotenda kwaari aarashwi: asi uwo usikamutendi wakatorashwa nazino, ngokuti aazi kutenda zina rouwo wakabarwa ari ega Mukororo wa-

Mjari. 19 Uku ndikwo kurashwa, kuti kujeka kwakaguma munyika, nevanhu vakada cidima kakurutu kupinda kujeka, ngokuti mishando yavo yalinga yakashata. 20 Ngokuti nokunyati ndiani unoita zakashata unonyenya kujeka, naye, aauyi mukujeka, ngokuti mishando yake inozorambidzwa. 21 Asi uwo unoita zinegwinyiso unouya mukujeka, kuti mishando yake inga onekeswa kuti yakaitwa ndiMjari.

22 Ngasure kweizi Jesu wakauya nevadzidzi vake munyika yeJudia; naye wakagara apo nabo, ecibapatidza. 23 NaJohani wabapatidza muAinoni pasinde pesaremi, ngokuti yalapo mvura yakawanda: vakauya vakabapatidzwa. 24 Ngokuti Johani inga asati apakidzwa mutirongo. 25 Naapo kwakaapo kukanidzana pakati pevadzidzi vaJohani nomuJuda ngendaa yokuceneswa. 26 Nabo vakauya kuna Johani vakati kwaari, Rabi, uwo waia newe seri kweJordani, uwo wowakaita capupu ndiye, ringira, iye unobapatidza naveshe vanouya kwaari. 27 Johani wakapingura, akati, Munhu aanasimba rokuashira ciro nokuti ngeciri kuti askazi kucipupa kubva mudenga. 28 Imngi mngemene mngakaita capupu ndini kuti ndakati, Andiriye akadi Kristu, asi kuti ndakatumpha pamberi pake. 29 Iye unanyamuroorwa ndiye mukwambo; asi shamjari yomukwambo inoema yecimuzwa, inodakara ngendaa yezwi romukwambo: ndizo uku kudakara kwangu kwazarisika. 30 Kunotamika kuti iye akuriswe, asi kuti inini nditsonge.

31 Uwo unouya ecibva mudenga uri padera pazeshe: iye unobva munyika ngowenyika, naye unoe-reketa zomunyika: iye unobva mudenga uri padera pazeshe. 32 Naye unopupura ngeizo zaakaona, nezaakazwa; akuna munhu unoashira capupu cake. 33 Uwo wakaashira ucapupu hwake, wakagwinyisisa kuti Mhari uri gwinyiso. 34 Dgokuti uwo waakatuma Mhari unoereketa mazwi aMhari; ngokuti iye aahini kwaari Mjeya ngokuedzanisa. 35 Baba vanoda Mukororo, navo vakaturira zeshe munyara dzake. 36 Iye unotenda Mukororo watoa nokupona kusikaperi; nouwo usikatendi Mukororo, aazooni kupona, asi ushungu hwaMhari hunondogara padera pake.

4 Ndizo apo Mambo azia kuti vaFarisi vaingga vazwa kuti Jesu wailita nokubapatidza vadzidzi vakawanda kupinda Johani. 2 (Asi Jesu emene aazi kubapatidza, asi vadzidzi vake vaibapatidza.) 3 Wakabva Judia, wakauyaze mugarire. 4 Kwaitamika kuti aparure ngomuSamaria. 5 Ndizo wakaguma kuguta revaSamaria rinzwi Sukari, pasinde pendau iyo yaakahina Jakobe kuno mukororo wake Josefa. 6 Zino cinyuka caJakobe calapo. Ndizo Jesu aingga aremba ngomuhambo wake wakaragara apo pacinyuka: kunonga raia awa recitanhatu. 7 Kwakaguma apo dzimai reSamaria kucera mvura: Jesu wakati kweriri, Ndipe ndimje. 8 Dgokuti vadzidzi vake ingga vaenda kuguta kwootenga zokudya. 9 Dzimai reSamaria rakati kwaari, cinyini kuti iwewe,

uri muJuda ukumbire mvura yokumga kwendiri ndiri dzimai reSamaria? (Dgokuti vaJuda avaiyani nevaSamaria.) 10 Jesu wakapingura, akati kweriri, kudai walzia iwewe, cipo caMhari, nokuti ndiani uwo unokumbira kwouri, kuti, Ndipe, ndimje, iwewe walzokumbira kwaari, naye walzokupa mvura yokupona. 11 Dzimai rakati kwaari, Mambo, auna cidzio cokucera ndico, necinyuka cakadzama: ndizo mvura yokupona unayo pari? 12 Uri mukuru iwewe here kuna baba edu Jakobe, uwo wakatipa ici cinyuka, naye wakamga kweciri emene, nevakororo vake, nemitanga yake? 13 Jesu wakapingura akati kweriri, Nokunyati ndiani unomga kuneiyi mvura, unozozwaze nyota: 14 Asi uwo unomga kune mvura iyo yendinozomupa inini, aacazozwize nyota mhera-narini; asi mvura iyo yendinozomupa inozoitika cinyuka cemvura mukati mngake, ceci verukira kupona kusikaperi. 15 Dzimai rakati kwaari, Mambo ndipe mvura iyo, kuti ndisacazozwe nyota nokuti ndisacazouya panoze kucera. 16 Wakati kweriri, Enda, woodaidza mnamuna wako, muuye pano. 17 Dzimai rakapingura rikati, Andina mnamuna: Jesu wakati kweriri, Wanasa kuronza kuti, Andina mnamuna: 18 Dgokuti waimboia nevamuna vashano, nouwo woutori naye zino aari mnamuna wakopi: ngeico waereketa gwinyiso. 19 Dzimai rakati kwaari, Mambo, ndinoona kuti uri muprofeti. 20 Madzibaba edu akadira kune iri dunhu, neimngimngi munoti, kuti, muJerusarema ndiyo ndau inosisa kudfirirapo. 21 Jesu

wakati kweriri, Dzimai, tenda ici, kuti nguva inouya apo amuzodiriri Baba kune iri dunhu kunyazi muJerusarema. 22 Imnjimnji muno-dira comusikazii; isisu tinodira cetinozia: ngokuti ruponeso runobva kuvaJuda. 23 Dgokuti nguva inouya, nazino yaapano, apo vadiri vecakwadi vanozodira Baba ngo-Mjeya necakwadi: ngokuti Baba vanotsaka vakadaro kumudira. 24 Mjari ndiMjeya, naavo vanomudira kunotamika kuti vamudire muMjeya negwinyiso. 25 Dzimai rakati kwaari, Ndinozia kuti Mesia unouya, uwo unozwi Kristu: naapo auya unozotironzera ziro zeshe. 26 Jesu wakati kweriri, Ndini aye unoereketa newe.

27 Dgenguva iyi vadzidzi vake vakauya, navo vakashama ngokuti waiereketa nedzimai: kani zakanyardaro akuna wakati kwaari kuti, Unotsakenyi? nokuti, Unoereketa naro ngenyi? 28 Ndizo dzimai rakasia nhuvi yaro, rakahwirira kuguta, rikati kuvanarume, 29 Uyai muone munhu uwo wandironzera zeshe zendakaita: uyu andiye here Kristu? 30 Ukaabuda kubva muguta, veluya kwaari. 31 Dgenguva iyo vadzidzi vake vakamunyengerera, veciti, Rabi, idya. 32 Asi wakati kwavari, Inini ndinakwo kudya kwomusikazii imnjimnji. 33 Ndizo vadzidzi vakati umnje kwoumneni, Uripo here munhu wamunzira cokudya? 34 Jesu wakati kwavari, Kudya kwangu ngokwokuti ndiite kuda kwowakandituma, nokupedza mushando wake. 35 Amuronzi here kuti kwasara mnedzi mirongomuna naapo kwoguma kukukura? Riggirai, ndinoti kwomuri, mirudzai madziso enyu,

muringise muminda, ngokuti yacena nazino yosisira kukukurwa. 36 Nouwo unokukura unoashira misharo, nounounganidza micero yokupona kusikaperi. Kutu iye unosima naye unokukura vadakare pamnepo. 37 Dgokudai cisana ici cinegwinyiso cokuti, Umnje unokusha, noumneni unokukura. 38 Ndakamutuma kuti mukukure izo zomusikazi kushandira: vanhu vamneni vakashanda neimnjimnji mnakapoterera mumushando wavo.

39 Nebanhu vazhinji bevaSamaria beguta iro vakamutenda ngenda yezwi redzimai, rerakapupura, kuti, Wandironzera zeshe zendakaita. 40 Ndizo apo vaSamaria vaingga vaguma kwaari, vakamunyengerera kuti agare navo: naye wakagara apo mazuva mairi. 41 Nevazhinji vamneni vakamutenda ngenda yezwi rake remene: 42 Navo vakati, kune dzimai. Zino tinotenda, haiwa ngenda yokuereta kwako, ngokuti taratamuzwa temene, nesu tinozia kuti uyu ngecawadi uri Muponesi wenyika.

43 Dgesure kwemazuva mairi wakabva apo, akaenda muGarire. 44 Dgokuti Jesu emene wakapupura kuti muprofeti aaremeredzwi munyika yokwake. 45 Ndizo apo aguma muGarire, vaGarire vakuashira, ngokuti beshe vaingga vakaona zeshe zaakaita muJerusarema pamushongano wokudya: ngokuti ara navo vakaenda kumushongano wokudya.

46 Ndizo Jesu wakauyaze muKana reGarire, apo paa-kapindudza mvura kulta vini. Kwaiapo nduna yakatikuti yala nomukororo wayo wairwara muKaperanaume. 47 Naapo yazwa

kuti Jesu waingga abva Judia, aguma muGarire, yakaguma kwaari, yakamunyengerera kuti adzake aponese mukororo wayo, ngokuti waingga odo kufa. 48 Jesu wakati kweiri, Kuti musikaoni mioniso nemishamiso amuzotendi. 49 Nduna yakati kwaari Mambo, dzaka mjana wangu asati afa. 50 Jesu wakati kweiri, Enda, mukororo wako waponi. Munhuwo wakagonda izwi raakaereketa kwaari Jesu, naye wakaenda. 51 Kwakati acadzaka, varanda vake vakashongana naye, veciti, Mjana wako waponi. 52 Ndizo wakabvunza awa iro raakatanga kuitanane ndiro. Nayo wakati kwaari, Zuro ngeawa recinompe mutsarara wakamusia. 53 Ndizo baba akazia kuti ndiro awa raakaereketa Jesu kwaari kuti, Mukororo wako waponi: naye wakatenda, nevemhatsi yake yeshe. 54 Uyu ndiwoze mushamiso wechiri wakaita Jesu, apo aguma Garire abva Judia.

5 Sure kweizi kwalapo mushongano wokudya wavaJuda, naJesu wakakwira Jerusarema.

2 Zino riripo muJerusarema gandwa ngepacimana cemakwai, rinodaidzwa ngokweciHeberu Betsaida, rinemaBerere mashano. 3 Mukati mnao mjalata vazhinji vairwara, vava mapofu, nevaikumhina, nevakaputa, vecigarira kuzungunyiswa kwemvura. 4 Ngokuti ngomukuwo wakatikuti, ngirosi yaidzaka mugandwa nokuvundura mvura: ndizo nokunyati ndiani waitanga kupoterompo apo mvura yavundurwa waimhodyoswa nokunyati wava nenhenda yakaitawani. 5 Kwalapo munhu wakatikuti wava

nenhenda yake makore ari makumi matatu namasere. 6 Naapo Jesu amuona akaata, waizia kuti zino inga anazo mukuwo wakareba, wakati kwaari, Unoda kutambiswa here? 7 Nouwo waingga akaputa wakapingura kwaari, eciti, Mambo, andina munhu wokundidzakisira mugandwa apo mvura yovundurwa: asi mukuenda kwangu, umjeni unodzaka kunditangidza. 8 Jesu wakati kwaari, Miruka, utore manhi ako uhambe. 9 Pariipo munhuwo wakamhodyoka wakatora manhi ake akahamba. Dgezuva iro rala sabata. 10 Ndizo vaJuda wakati kwaari uwo wakamhodyoswa, Riri zuva resabata, akutenderwi kwouri kuti utware manhi ako. 11 Asi iye wakapingura, kuti, Uwo wakaita kuti ndimhodyoke ndiye wakati kwe ndiri, Tora manhi ako uhambe. 12 Vakamubvunza veciti, Ndiani munhu uwo wakati kwouri, Tora manhi ako, uhambe? 13 Asi uwo wakamhodyoswa aazi kuzia kuti ndiani: ngokuti Jesu inga aenda ngokuti mbungano huru yayapo pandau iyo. 14 Dgesure kweizi Jesu wakamuona ari mutemperi, naye wakati kwaari, Ringira, wakamhodyoswa, usacashaishaze, kuti ciro cakapinda kushata kune ico cisazokugumira. 15 Naapo munhu wakaenda, wakashuma kuvaJuda kuti ndiJesu wakamumhodyosa. 16 Dgendaa iyo vaJuda vakamutambudza Jesu, ngokuti wakaita izi ngezuva resabata. 17 Asi iye wakavapingura, Baba angu vanondoshanda metsa nazino, neni ndinoshanda. 18 Ndizo vaJuda vakapindisisa kutaka kumuuraya, ngokuti iye aazikugura sabata

kwega asi wakaronza kuti Mŋari waia Baba ake aemho, ecidziita unoedzana naMŋari.

19 Ndizo Jesu wakapingura, akati kwavari, Zirokwazo, zirokwazo, ndinoti kwomuri, Mukororo aana simba rokuita ciro ngokwake, asi caanoona Baba eciita: ngokuti izo zaanoita Baba, izize Mukororo unoitawo ngokudaro. 20 Dgokuti Baba vanomuda Mukororo, vanomupangidzira zeshe zava-noita vemene: vanozomupangidzira mishando mikuru kune iyi, kuti mushame. 21 Dgokuti kudai ndi-Baba vanomusa avo vakafa, nokul-ta kuti vararame, Dgokudaroze Mukororo unoraramisa avo vaa-noda. 22 Dgokuti Baba avatongi munhu naumŋe, asi vakahina kutonga kweshe kuno Mukororo; 23 Kuti veshe varemeredze Mukororo kudai ngeze vanoremeredza Baba. Uwo usikaremeredzi Mukororo, aamuremeredzize Baba uwo wakamutuma. 24 Zirokwazo, zirokwazo, ndinoti kwomuri, kuti iye unozwa izwi rangu, atende uwo wakandituma, waanakwo kupona kusikaperi, aacazopindi mukutongwa, asi wadarika kubva mukufa, kupotera mukupona. 25 Zirokwazo, zirokwazo, ndinoti kwomuri, kuti nguva inouya, nazino yaapano, apo vakafa vanozorizwa izwi roMukororo waMŋari, naavo vanozorizwa vanozopona. 26 Dgokuti kudai ndiBaba unokupona mukati mŋake, ngokudarowo wakahina Mukororo kuti aanokupona mukati mŋake. 27 Naye wakahina kwaari simba rokugura ndaa, ngokuti iye uri Mukororo womunhu. 28 Musashama ngeici, ngokuti nguva inozouya

apo veshe vari mumaiŋa vanozorizwa izwi rake; 29 Nayo vanozobudomŋo, avo vakaita zakanaka mukumuka kwokupona, naavo vakarovedzera kuita zakashata mukumuka kwokutongwa.

30 Andina simba rokuita ciro ngokwanggu; kudai ngezendinozwa ngokudaro ndinotonga, nokutonga kwangu kuri kwakarurama, ngokuti anditŋaki kuda kwangu, asi kuda kwouwo wakandituma. 31 Kudai ndecidzipupurira, ucapupu hwangu ahuna gwinyiso. 32 Uripo unhani unoita capupu ndini, neni ndinozia kuti ucapupu hwaanopupura ndini hunegwinyiso. 33 Imŋimŋi mŋakatuma kuna Johani, naye wakaita capupu kune ziro zegwinyiso. 34 Asi inini andiashiri ucapupu hunobva kumunhu asi ndinoereketa izi kuti muponeswe. 35 Iye waia rumvenu runobaka runojekisa, neimŋimŋi mŋakatenda kuti mudakare kanguva mukujeka kwake. 36 Asi inini ndinoucapupu hunopinda kugwinya kune hwaJohani: ngokuti mishando iyo yaakandipa Baba kuti ndiipedze, ndiyo mishando yendinoita, inopupura ndini. kuti Baba vakandituma. 37 NaBaba uwo wakandituma, wakaita capupu ndini. Amuzi kuto-ngozwa izwi rake nakamŋe, nokuti kutongona muemo wake. 38 Nemŋi amuna mazwi ake anogara mukati mŋenyu, ngokuti amuzi kutenda uwo waakatuma. 39 Tŋakisisai zinyoro, ngokuti mukati mŋazo munopinimidza kuti munokupona kusikaperi, nelzi, ndizo zinopupura ndini. 40 Nemŋi amutendi kuuya kwendiri, kuti muone kupona. 41 Andiashiri kulrikidwza kunobva kuvanhu. 42

Asi ndinomuzia kuti amuna rufo rwaMjari mukati mjenyu. 43 Inini ndakaguma ngezina raBaba angu nemni amuzi kundishira: kudai umjeni ecizouya ngezina rake remene, iye munozomushira: 44 Mungaita matendere nyi imjimi munoashira kuirikidzwa kubva kuno umjeni noumjeni, musikatsaki kuirikidzwa ukwo kunobva kuna Mjari ega? 45 Musapinimidza kuti inini ndinozomutsa kuna Baba: uripo umje unozomutsa, ndiMosi, uwo womunogonda. 46 Ngokuti dai mjakatenda Mosi inga mjakatendawo nelini: ngokuti iye wakanyora ndini. 47 Asi kuti musikatendi zakanyorwa zake, mungazoita matenderenyi mazwi angu?

6 Ngasure kwezi Jesu wakambuka ruseri rwebahari reGarire, riri reTiberiasi. 2 Nembungano huru yakamuteera, ngokuti inga yaona mishamiso yaakaita kwavari vairwara. 3 NaJesu wakakwira mudunhu, umjo akagara pashi nevadzidzi vake. 4 Zino pasika, mushongano wokudya wevaJuda, rakakwedzera. 5 Ndizo Jesu amirudza madziso ake, aona kuti mbungano huru inga yeciuya kwaari, wakati kuna Firipu, Tinozotenga pari zingwa kuti ava vadye? 6 Asi wakaereketa izi kumuedza: ngokuti iye waizia caanozoita. 7 Firipu wakamupingura eciti, zingwa zepondo nomje azivakwanisi kuti uwo nouwo atore kadodoko. 8 Umje wevadzidzi vake, Andreu munuguna waSimoni Petro wakati kwaari. 9 Ciri pano cirumbgana cidokocine zingwa zebare zishano nezi-

hove ziiri: kani izi zingadetserenyi kuvanhu vazhinji vakadai? 10 Jesu wakati. Garisai vanhu pashi. Kwaiapo pandau iyo mjenje wakawanda. Ndizo vanarume vakagara pashi, ingatei vala makumi emazana ari mazana mashano ngokuwanda. 11 Ndizo Jesu waktora zingwa; naapo abonga, wakakovanisa kuna avo vaingga vakagara pashi; nezihove ngokudaro kudai ngokuda kwavo. 12 Naapo vaguta wakati kuvadzidzi vake, Unganidzal matsekeneswa ezakasara, kuti kusarashwa ciro. 13 Ndizo vakaunganidza, vakadzadza zitundu zirigumi naziri ngematsekeneswa ezingwa zebare zishano ao akasara kuna avo vaingga vadya. 14 Ndizo vanhu avo vaona uyu mushamiso waakaita, wakati, Zirokwazo uyu ndiye muprofeti uwo unouya munyika.

15 Ndizo apo Jesu ecizia kuti vodo kuuya kuti vamutore ngesimba kuti vamuite Mambo, wakataraukaze kuenda kumutunhu ari ega.

16 Kwakati zuva rafira vadzidzi vake vakadzaka kubahari; 17 Wakakwira mungarava wakambuka bahari kuenda Kaperanau-me. Inga kwaŝipa naJesu inga asati aguma kwavari. 18 Nemafulungu ebahari akakwira ngendaa yedutu guru raivuvuta. 19 Naapo vaingga vabvua mamaera matatu kunyazi marongomuna vakaona Jesu ecihamba padera pebahari ecikwedzera kungarava, navo vakatya. 20 Asi wakati kwavari, Ndini hangu, musatya. 21 Ndizo vakamuashira mungarava, paripo ngarava yakaguma kunyika kwavaienda.

22 Necimangwani apo mbungano iyo yainga yakaema ruseri rwebahari, yakaona kuti inga pasina ngarava imneni, yega imne iyo yevainga vapotera kweiri vadzidzi vake, nokuti Jesu aazi kukwira pamnepo nevadzidzi vake mungarava, asi kuti vadzidzi vake vainga vaenda vari vega, 23 Kani kwakauya ngarava dzimneni dzakabva Tiberiasi dzikaguma pasinde penda apo pavakadya zingwa ngesure Mambo azibonga. 24 Ndizo apo mbungano yaona kuti Jesu inga pasina apapo, nokuti vadzidzi vake, yakakwirawo mungarava yakauya muKaperanaume yecimutshaka Jesu. 25 Naapo yainga yamuona ruseri rwebahari, yakati kwaari, Rabi, waguma pano rini? 26 Jesu wakapingura, akati, Zirokwazo, zirokwazo, ndinoti kwomuri, amunditshaki ngokuti mna-kaona mishamiso asi ngokuti mnakadya zingwa mukaguta. 27 Musashandira kudya ukwo kunopera, asi kudya ukwo kunogara mhera narini kwaanozomupa mukororo womunhu: ngokuti padera pake Baba Mhari wakaisa cioniso cake. 28 Naapo vakati kwaari, Tingaitenyi kuti tishande mishando yaMhari? 29 Jesu wakapingura, akati kwavari, Uyu ndiwo mushando waMhari kuti mutende uwo waakatuma. 30 Navo vakati kwaari, Unoita muonisonyi kuti tione titende kwouri; unoshandenyi? 31 Madzibaba edu akadya mana mushango, kudai ngezezakanyorwa, Wakavapa cingwa cakabva mudenga kuti vadye. 32 Ndizo Jesu wakati kwavari, Zirokwazo, zirokwazo, ndinoti kwomuri, andiye Mosi akadi wakamupa cingwa

cakabva mudenga, asi Baba angu ndiye unomupa cingwa cegwinyiso cinobva mudenga. 33 Ngokuti cingwa caMhari ciri uwo wakabva mudenga, unohina kupona kunyika. 34 Ndizo vakati kwaari, Mambo, tipei ngenguva dzeshe ici cingwa. 35 Jesu wakati kwavari, Inini ndiri cingwa cokupona, aye unouya kwendiri aatongozwi nza-ra, nouwo unotenda kwendiri aatongozwi nyota. 36 Asi ndakati kwomuri kuti mnakandiona, asi amuzi kunditenda. 37 Ueshe avo vaanondipa Baba vanozouya kwendiri, nouwo unouya kwendiri andizomurashi akadi. 38 Ngokuti andizi kudzaka kubva mudenga kuti ndiite kuda kwangu asi kuda kwouwo wakandituma. 39 Uku ndikwo kuda kwowakandituma, kuti veshe vaakandipa andizorashikirwi naumne kwavari, asi kuti ndivamuse ngomushi wokupera. 40 Ngokuti uku ndikwo kuda kwaBaba angu, kuti munhu weshe unoringira Mukororo nokutenda kwaari unoanokupona kusikaperi, neni ndinozomumusa ngomushi wokupera.

41 Ndizo vaJuda vakavuruvuta ndiye, ngokuti wakati, Inini ndiri cingwa ico cakabva mudenga. 42 Navo vakati, Uyu andiyepi here Jesu mukororo waJosefa, baba namai ake vetinozia? Zino unoita maereketerenyi, kuti, Ndakabva mudenga? 43 Jesu wakapingura akati kwavari, Musavuruvuta mukati mnenyu. 44 Akuna naumne unesimba rokuuya kwendiri, kudai Baba wakandituma asamukweya, neni ndinozomumusa ngomushi wokupera. 45 Kwakanyorwa ngava-

profeti, kuti, Ueshe vanozodzidzi-
swa ndiMnjari. Ndizo munhu
weshe wakazwa, ecidzidza, ndi-
Baba, unouya kwendiri. 46 Sandi-
kwo kuti uripo wakamuona Baba,
kwega iye wakabva kuna Mnjari,
ndiye wakamuona Baba. 47 Ziro-
kwazo, zirokwazo, ndinoti kwo-
muri, iye unotenda waanokupona
kusikaperi. 48 Inini ndiri cingwa
cokupona. 49 Madzibaba enyu va-
kadya mana mushango, vakafa.
50 Ici ndico cingwa cinobva mu-
denga kuti kunyazi ndiani kwo-
muri unocidya, aacafi. 51 Inini
ndiri cingwa cokupona cakabva
mudenga; kunyazi ndiani unocidya
ici cingwa unozorarama kusika-
peri: necingwa cendinozohina ciri
muiri wangu, wendinozohina kuti
uite kupona kwenyika.

52 Ndizo vaJuda vakaitirana
hasa pakati pavo, veiti, Mu-
nhuyu ungatiita mahinirenyi mui-
ri wake udyiwe? 53 Ndizo Jesu
wakati kwavari, Zirokwazo, zi-
rokwazo, ndinoti kwomuri, Ku-
dai musikadyi muiri wo-
Mukororo womunhu, musikamji
ngazi yake amuna kupona mukati
mgenyu. 54 Iye unodya muiri
wangu, amne ngazi wangu, waano-
kupona kusikaperi, neni ndinozo-
mumusa ngomushi wokupera. 55
Dgokuti muiri wangu uri kudya
aemho, nengazi wangu iri kumja
aemho. 56 Iye unodya muiri wa-
ngu, amne ngazi wangu, unogara
mukati mangu, neni ndinogara
mukati mneke. 57 Kudai ndi-
Baba vanopona vakandituma, neni
ndinopona ndiBaba, ngokudaro
iye unondidya, ndiye unozopona
ndini. 58 Ici ndico cingwa caka-
dzaka kubva mudenga cisikazi

kudai ngecakadya madzibaba enyu,
vakafa: iye unodya cingwa ici uno-
zopona kunoti narini. 59 Wakae-
reketa izi ecidzidzisa ari mu-
mhatso yokudira muKaparanau-
me.

60 Ndizo vazhinji vevadzidzi
vake apo vazwa vakati, Iri izwi
igukutu; ndiani unokona kurizwa?
61 Asi apo Jesu ecizia mukati
mneke kuti vadzidzi vake vakamu-
vuruvutira ngeici, wakati kwavari,
Ici cinomupumhunisa here? 62
Mungadini dai mnejona Muko-
roro womunhu ecikwira apo paala
pakutanga? 63 NdiMneya uno-
hina kupona, nyama ainyuri ciro:
mazwi endakaereketa kwomuri ari
mneya, nokurarama. 64 Asi va-
ripo vamjeni pakati penyu vasika-
tendi. Dgokuti kubvira pakuta-
nga, Jesu waindozia kuti ngava-
nani avo vasikatendi, nokuti ndiani
unozomupira. 65 Naye wakati,
Dgeiyi ndaa ndakaereketa kwo-
muri, ndeciti, Apana unesimba ro-
kuuya kwendiri kuti asikazi kuri-
puwa ndiBaba.

66 Kubvira ngouyu mukuwo va-
zhinji vevadzidzi vake vakahwirira
sure, avazi kucazohamba naye. 67
Ndizo Jesu wakati kuna varigumi
navairi, Munoda kuendawo here?
68 Simoni Petro wakamupingura,
Mambo, tingaenda kunani? mazwi
okupona kusikaperi ari kwouri.
69 Nesu takatenda, tinozia kuti
iwewe uri Wakacena waMnjari.
70 Jesu wakamupingura. akati,
Andizi kumutsanangura here mu-
rigumi navairi, noumne wenyu uri
diaboro? 71 Asi wakaereketa ndi-
Judasi Isikarioti, mukororo wa-
Simoni: ngokuti ndiye waizomu-
pira, ari umne wevarigumi navairi.

7 Dgesure kwelzo Jesu wakahamba muGarire, ngokuti inga asikacadi kuhamba muJudia, ngokuti vaJuda vaitsaka kumurraya. **2** Zino mushongano wokudya kwevaJuda, mushongano wokugara mumicaca, waia pasinde. **3** Ndizo vanuguna vake vakati kwaari, Ibva pano uende muJudia, kuti vadzidzi vakoze vaone mishando yako younoita. **4** Dgokuti akuna munhu unolta ciro ngokufishika, ecitsaka kuti aziikane pamhene. Kudai wecilita izi ziro dzipangidzire kuna veshe omunyika. **5** Dgokuti vanuguna vake inga vasadi vatenda kwaari. **6** Ndizo Jesu wakati kwavari Dguva yangu aisati yaguma akadi, asi nguva yenyu yakandonaka mukowo weshe. **7** Nyika ainga munyenyezi akadi, asi inondinyenya inini ngokuti ndinopupura ndiyo, kuti mishando yayo yakashata. **8** Kwirai imnjimni kumushongano uyu wokudya: inini andikwiriyo zino kumushongano uyu wokudya; nguva yangu aisati yaguma. **9** Apo aereketa izi kwavari wakagara muGarire.

10 Asi apo vanuguna vake vainga wakwira kumushongano wokudya, wakakwirawo, haiwa pamhene, asi ngokufishika. **11** Ndizo vaJuda vakamutshaka mumushongano wokudya, vakati, Umboripari? **12** Kwaiapo kuvuruvuta kukurutu pakati pembungano ngendaa yake: vamneni vakati, Uri munhu kwaye, asi vamneni vakati, Haiwa asi unopaukisa mbungano. **13** Asi apana munhu wakaereketa ndiye pamhene ngendaa yokutya vaJuda.

14 Asi apo mushongano woku-

dya waapakati, Jesu wakakwira mutemperi wakadzidzisa. **15** Ndizo vaJuda vakashama veciti, Uyu unolta maziirenyi zinyoro, asikazi kudzidza? **16** Ndizo Jesu wakavapigura, akati, Kudzidzisa kwangu angokwangu akadi, asi ngokwouwo wakandituma: **17** Kunyazi ndiani unoda kuita kuda kwake, unozozia ngendaa yecidzidziso, kuti cinobva kuna Mhari here nokuti ndinodziereketera. **18** Iye unodziereketera unotshaka kuirikidzwa kwake; asi iye unotshaka kuirikidza uwo wakamutuma, ndiye uri wegwinyiso, apana kusikarurami mukati mngake. **19** Mosi aazi kumupa here zironzo, asi apana pakati penyu unongwarira zironzo. Munotshakirenyi kundiraya? **20** Mbungano yakapigura, Unedimoni; ndiani unotshaka kukuuraya? **21** Jesu wakavapigura, akati kwavari, Ndakaita mushando umne, nemni mneshe mnakashama. **22** Dgeiyi ndaa Mosi wakamupa kuti mucekwe (asi angokwa Mosi akadi, asi kwakabva kumadzibaba,) Nemni ngezua resabata munoceka munhu. **23** Kudai munhu eciashira kucekwa ngezua resabata, kuti cironzo caMosi cisagurwa, hino munonditsenekera ngenyezi ngokuti ndakamhodyosa munhu ngesabata? **24** Musatonga ngokuoneka kwokubanzi, asi tongai kutonga kwakwo.

25 Ndizo vamneni vakatikuti veJerusarema vakati, Uyu andiyepi here uwo wevaitshaka kuuuraya? **26** Ringirai unoereketa pamhene, navo avaereketi ciro kwaari. Uatongi avazii here ngecawadi kuti uyu ndiKristu. **27**

Asi uyu tinomuzia paanobva: asi apo Kristu ozouya apana naumŋe unozozia kuti unobva pari. 28 Ndizo Jesu wakadaidzira ari mutemperi ecidzidzisa, akati, Munondizia, munoziaze pendinobva, neni andizi kuuya ngokwangu, asi aye wakandituma unegwinyiso, nemyi amumuzii. 29 Asi inini ndinomuzia; ngokuti ndinobva kwaari, naye wakandituma. 30 Ndizo vakatsaka kumubata, asi apana naumŋe wakaisa nyara padera pake, ngokuti nguva yake inga isati yaguma. 31 Nevazhinji vembungano vakatenda kwaari, vakati, Apo Kristu ouya unozokona here kuita mishamiso inopinda iyi yakaitwa ngouyu munhu? 32 UaFarisi vakazwa kuti mbugano yaivuruvuta ngeizi ziro ndiye; nevapristi vakuru nevaFarisi vakatuma nhunge kuti dzimubate. 33 Ndizo Jesu wakati, Inguva doko ndicinemni, neni ndinozoenda kwouwo wakandituma. 34 Munozonditaka, asi amuzondioni: nependiri, amuna simba rokugumapo. 35 Ndizo vaJuda vakaereketa pakati pavo, veciti, unozoenda kuri kwetisikazomuoni isisu? unozoenda here kune vakaparadzika vevaGreki, nokuvadzidzisa vavaGreki? 36 Rinotinyi izwi iri raakaereketa, kuti, Munozonditaka, asi amuzondioni, nependiri amuna simba rokugumapo?

37 Dgezuya rokupedzisira, mushi mukuru womushongano wokudya, Jesu wakamiruka, akadaidzira, eciti, Kunyazi ndiani une nyota ngaauye kwendiri, amŋe 38 Iye unotenda kwendiri, kudal ngokuronza kwezinyoro, ndwizi dze-

mvura yokupona dzinozopopoma kubva mundani mŋake: 39 Asi wakaereketa ici ngendaa yoMŋeya wavanozoashira avo vanotenda kwaari: ngokuti Mŋeya wainga usati wahinwa, ngokuti Jesu inga asati airikidzwa. 40 Ndizo vamŋeni vembungano, apo vazwa aya mazwi, vakati, Dgecakhwadi uyu ndiye Muprofeti: 41 Uamŋeni vakati, Uyu ndiye Kristu. Asi vamŋeni vakati, Kristu ungapva Garire here? 42 Zinyoro azironzi here kuti Kristu unozobva kurudzi rwaDavida, nokubva Beterehema, muguta apo paaigara Davida? 43 Ndizo kwaiapo kuparadzana pakati vembungano ngendaa yake. 44 Uamŋeni kwavari vakada kuti vamubate, asi apana wakaisa nyara padera pake.

45 Ndizo nhunge dzakauya kuvapristi vakuru nevaFarisi, nabo vakati kwedziri, Mjareka kuuya naye ngenyi? 46 Nenhunge dzakapingura, Narini, akuna munhu wakamboereketa kudal ngouyu munhu. 47 Ndizo vaFarisi vaka-dzipingura, Nemniwo mŋacenge-dzerwa here? 48 Uripo here wevatongli nokuti wevaFarisi wakamutenda? 49 Asi iyi mbugano isikazli zironzo yakatukwa. 50 Nikodemusi ari umŋe wavo, (uwo wakaguma kwaari pakutanga,) wakati kwavari, 51 Zironzo zedu zinorasha here munhu, tisati tamuzwa, nokuzia caanolta? 52 Ukamupingura, vakati kwaari, Newe auri weGarire here? Tsakisisa uone, ngokuti akuna muprofeti unobva Garire.

53 Nomunhu weshe wakapararira kuenda kumhatso yake.

8 Na Jesu wakaenda kudunhu raMaorive. 2 Mangwanani maishi wakauyaze mutemperi, nevvanhu veshe vakauya kwaari; naye wakagara pashi, akavadzidzisa. 3 Uanyori nevaFarisi vakaunza kwaari dzimai rakabatwa reciomba, naapo vainga varigadzika pakati, vakati kwaari, 4 Mudzidzisi, iri dzimai rakabatwa mu kuomba, reciomba aemho. 5 Zino Mosi wakatipanga muzironzo kuti vakadaro vapondwe ngamapuwe: asi iwewe unotinyi? 6 Asi ici vakaereketa vecimuedza, kuti vaone cokumuparise ndaa ndico. Asi Jesu wakakotama pashi, akanyora ngecinwe pamavu. 7 Asi apo vaangira kumubvunzisisa, wakadziruramisa, akati kwavari, Iye usina kushaisha pakati penyu, ngatangé kukandira buwe kumuponda. 8 Wakakotamazé pashi, akanyora pamavu. 9 Naovo vakazwa, vecitirwa ndaa ngemhumba dzavo, vakaβuda umne ngaumne, kubvira kuvasharuka metsa kuvadoko: naJesu wakasara ari ega nedzimai rakagara pakati. 10 Naapo Jesu ainga adziruramisa, wakaona dzimai rega akati kweriri, Dzimai, vari pari avo vakakuitira ndaa? Apana here wakakurasha? 11 Rakati, Akuna, Mambo, Jesu wakati kweriri, neni andikurashi: enda, usacazoshashaze.

12 Ndizo Jesu wakaereketaze kwavari, eciti, Inini ndiri kujeka kwenyika: aye unonditeera, aazohambi mucidima, asi unozoa nokujeka kwokupona. 13 Ndizo vaFarisi vakati kwaari, Unodzipupurira: ucapupu hwako ahuna gwinyiso. 14 Jesu wakapingura, akati kwavari, Nokunyati ndecidzi-

pupurira ucapupu hwangu hune-gwinyiso, ngokuti ndinozia pendakabva, nependinoenda: asi imnini amuzii pendakabva, nependinoenda. 15 Imnini munotonga ngokwenyama, inini anditongi munhu. 16 Kani ndecinyatonga, kutonga kwangu kune gwinyiso, ngokuti andiri ndega akadi, asi inini ndiri pamnipo naBaba vakandituma. 17 Kwakanyorwa muzironzo zenyu kuti ucapupu hwanvahu vairi hune gwinyiso. 18 Inini ndiriye unodzipupurira, naBaba vakandituma ivo vanopupura ndini. 19 Ndizo vakati kwaari, Dari pari Baba ako? Jesu wakapingura, akati, Imnini amundizii, nokuti Baba angu; dai mnaindizia, mnainzozia Baba anguze. 20 Jesu wakaereketa aya mazwi muugaro hwezipo, ecidzidzisa ari mutemperi: apana wakamubata ngokuti nguva yake inga isati yaguma.

21 Ndizo wakati kwavari, Inini ndinoenda, nemni munozonditšaka nemni munozofira muzishaishi zenyu: napendinoenda amuna simba rokuuya apo. 22 Ndizo vaJuda vakati, unodziuraya here? ngokuti unoti, Pendinoenda, imnini amuna simba rokuuya apo. 23 Wakati kwavari, imnini muri vepashi, inini ndinobva mudenga: imnini muri venyika iyi, asi inini andiri wenyika iyi akadi. 24 Ndizo ndakati kwomuri kuti munozofira muzishaishi zenyu: ngokuti kudai musikatendi kuti ndiri aye munozofira muzishaishi zenyu. 25 Ndizo vakati kwaari, Uriani iwewe? Jesu wakati kwavari, Ndiri uwo wendakamuronzera mukutanga. 26 Ndine zakawanda zokuereketa ndimni nokutonga: asi iye waka-

ndituma uri gwinyiso; neni ndinoereketa kunyika izo zandakazwa kubva kwaari. 27 Avazikuzia kuti waiereketa kwavari ndiBaba. 28 Ndizo Jesu wakati kwavari, Apo mjazomukwidza Mukororo womunhu, naapo munozozia kuti inini ndiri aye, nokuti anditi ciro ndemene, asi kudai ngezendakadzidziswa ndiBaba, izi ndizo zendoereketa. 29 Nouwo wakandituma undori neni: aazi kundisia ndega; ngokuti ndinoita mukuwo weshe izi zinomudakadza. 30 Acaereketa, vazhinji vakatenda kwaari.

31 Ndizo Jesu wakati kuna avo vaJuda vakatenda kwaari, Kudai mjecigara mumazwi angu ngegwinyiso muri vadzidzi vangu. 32 Nemni munozozia gwinyiso ngegwinyiso rinozomusunhura. 33 Vakamupingura, Isisu tiri vorudzi rwaAbraham, atizi kumboitwa varanda ngomunhu naumne: unodaro ngenyi kuti munozosunhurwa? 34 Jesu wakapingura, Zirokwazo, ndinoti kwomuri, kuti, nokunyati ndiani unoita kushaisha, urimuranda wokushaisha. 35 Nomuranda aagari mumhatso mhera narini, asi mukororo unogaremgo mhera narini. 36 Ndizodai Mukororo ecizomusunhura, munozosunhurwa aemho. 37 Ndinozia kuti imnjimji muri vorudzi rwaAbrahama: asi munotşaka kundiuraya, ngokuti izwi rangū arina ndau mukati mnyenyu. 38 Inini ndinoereketa izo zendakaona kuna Baba angu, nemniwo munoita zemnakazwa kuna Baba enyu. 39 Vakamupingura, vakati kwaari, Baba edu ndiAbrahama. Jesu wakati kwavari, Kudai mjaia vana vaAbrahama, mjaizoita mishando

yaAbrahama. 40 Asi zino munotşaka kundiuraya ndiri munhu wakaereketa gwinyiso kwomuri, iro rendakazwa kuna Baba angu: Abrahama aazi kuita cakadai. 41 Imnjimji munoita mishando yaBaba enyu. Vakati kwaari, Isisu atizi kubarwa ngokuomba, tinaBaba umne ndiMjari. 42 Jesu wakati kwavari, Kudai Mjari ala Baba enyu, mungandida: ngokuti ndakabuda ndecibva kuna Mjari; ngokuti andizi kuuya ngokwangū, asi iye wakandituma. 43 Amuzwisisi ngenyi kuereketa kwangu? ngokuti amuna simba rokuzwisisa izwi rangū. 44 Imnjimji muri vaBaba enyu Diaboro, nokuemura kwaBaba enyu munoda kukuita. Uwo wala muurayi kubvira pakutanga, naye aazi kuema mugwinyiso, ngokuti gwinyiso amuna mukati mñake, apo eciereketa manyepo, unodziereketera, ngokuti iye uri munyepi naBaba emanepo. 45 Asi ngokuti inini ndinoereketa gwinyiso amunditendi. 46 Ndiani kwomuri ungandishova ngokushaisha? Kudai ndeciereketa gwinyiso amunditendi ngenyi? 47 Iye uri waMjari unozwamazwi aMjari; ngeiyi ndaa imnjimji amundizwi, ngokuti amuri vaMjari akadi. 48 VaJuda vakapingura, vakati kwaari, Atinasi kuronza here kuti uri muSamaria, newe unedimoni? 49 Jesu wakapingura, Inini andina dimoni, asi ndinoremredza Baba angu, nemni munondinyenyeredza. 50 Asi anditşaki kuirikidzwa kwangu, uripo umne unotşaka, nounotonga. 51 Zirokwazo, zirokwazo, ndinoti kwomuri, kunyazi ndiani unogwarira mazwi angu, aatonga-

zooni kufa. 52 VaJuda vakati kwaari, Zino tinozia kuti unedimoni. Abrahama wakafa, nava-profeti; newe unoti, Kunyazi ndiani unongwarira mazwi angu, aatongozozwi kufa. 53 Iwe-we uri mukuru here kuna baba edu Abrahama, wakafa, nevaprofeti vakafa: unodziita anani? 54 Jesu wakapingura, Kudai ndecidziirikidza, kuirikidzwa kwangu kuri kusina shwiro: ndiBaba angu anondirikidza, vomunoti ndivo kuti vari Mhari wenyu: 55 Nemni amuzikuvazia, asi inini ndinovazia, nokudai ndeciti, Andivazii, ndingaita munyepi kudai ndimni: asi ndinovazia, ndinongwarira mazwi avo. 56 Abrahama baba enyu akadakara ngokuriona zuva rangu; naye wakariona, akadakara. 57 Ndizo vaJuda vakati kwaari, ausati waane makore ari makumi mashano, newe wakaona Abrahama here? 58 Jesu wakati, kwaari, Zirokwazo, zirokwazo, ndinoti kwomuri, Abrahama asati abarwa, ndaindolapo. 59 Ndizo vakatora mapuwe kuti vamuponde, asi Jesu wakangaranga, akabuda kubva mutemperi.

9 Kwakati ecipinda wakaona munhu waia bofu kubvira mukubarwa kwake. 2 Nevadzidzi, vake vakamubvunza, veciti, Mudzidzisi, ndiani wakashaisha, uyu munhu kunyazi vabari vake, kuti abarwe ari bofu? 3 Jesu wakapingura, akati, Uyu munhu aazi kushaisha kunyazi vabari vake, asi kwokuti mishando yaMhari ioniswe ndiye. 4 Kunotamika kuti tishande mishando youwo wakandituma acimasikati: ngokuti usi-

ku hunouya apo apana ungazokona kushanda. 5 Apo ndicindori munyika, ndiri kujeka kwenyika. 6 Apo ainga aereketa izi, wakapfira pamavu, wakakanya matope ngamata, wakadzodza madziso aro ngedope. 7 Wakati kweriri, Enda, ushambe mugandwa reSiroma (ngokukumucwa kunoti, Wakatumna.) ndizo wakaenda, akashamba, wakauya oona. 8 Ndizo avo vakaakirana naye, naavo vaimuona kare, kuti waia rombe, vakati, Uyu andiyepi here uwo waigara ecipemha? 9 Uamneni vakati, Ndiye; vamneni vakati, Haiwa, asi unoto-dzana naye. Asi iye wakati, Ndiriye: 10 Ndizo vakati kwaari, Madziso ako akaita mapembendzirwenyi? 11 Wakati, Munhu unozwi ndiJesu wakaita matope, akadzodza madziso angu, akati kwendiri, Enda Siroma, ushambe: ndizo ndakaenda, ndikashamba, ndikaona. 12 Naavo vakati kwaari, Uri pari? Iye wakati, Andizii.

13 Ndizo vakamuunza kuvaFarisi aye waia bofu. 14 Raia sabata ngezuva iro apo Jesu akaita matope akapembendza madziso aro. 15 Ndizo vaFarisi vakahwirinzira kumubvunzaze, kuti wakaita mapembendzirwenyi. Asi wakati kwavari, Iye wakaisa matope pamadziso angu, neni ndakashamba, zino ndinoona. 16 Ndizo vamneni vavaFarisi vakati, Uyu munhu aabvi kuna Mhari akadi, ngokuti aangwariri sabata. Uamneni vakati, Munhu uri mushaishi ungaita maitirenyi iyi mishamiso? Kwakaapo kuparadzana mukati mnavo. 17 Ndizo vakatize kune bofu, Unotinyi ndiye iwewe, ngendaa yokuti wakape-

mbenudza madziso ako? Naye wakati, Uri muprofeti. 18 Ndizo vaJuda avazi kutenda kuti ndiye waia ari bofu, nokuti wakapembenuudzwa, metsa vakafaidza vabari vowakapembenuudzwa. 19 Navo vakavabvunza, veciti, Uyu uri Mukororo wenyu here, womunoti, kuti, wakabarwa ari bofu? Ndizo zino unoita maonerenyi? 20 Ndizo vabari vake vakapingura vakati, Cetinozia ngecokuti uyu uri Mukororo wedu, nokuti wakabarwa andori bofu: 21 Hino kuti unoita maonerenyi atizii, nokuti ndiani wakapembenuudza madziso ake, atizii: mubvunzenyi, wabva muzero, unozo dziereketera. 22 Vabari vake vakaronza izi ngokuti vaitya vaJuda ngokuti vaJuda inga vakatenderana kuti kunyazi ndiani unozomutenda kuti iye uri Kristu, unozodzingwa kubva kumhatso yokudira. 23 Dgeiyi ndaa vabari vake vakati, Wabvo muzero, mubvunzenyi. 24 Ndizo vakamudaidza ngokweciiri uwo waia bofu, vakati kwaari, Irikidza Mjari iwewe, isisu tinozia kuti uyu munhu uri mushaishi. 25 Ndizo iye wakapingura, Kunyazi ari mushaishi nokuti asiri, andizii; asi ciro cimne cega cendinozia, ngecokuti inini ndala bofu, zino ndinoona. 26 Ndizo vakati kwaari, wakaite nyi kwouri? wakaite mapembenuudzirenyi madziso ako? 27 Iye wakapingura, Ndatomuronzera, asi amuzi kutenda: munoda kucaita mazwirenanyi? Nemnjiwo munoda here kuita vadzidzi vake? 28 Ivo vakamutuka, veciti, Iwewe uri mudzidzi wake, asi isisu tiri vadzidzi vaMosi. 29 Tinozia kuti Mjari wakaereketa kuna Mosi, asi

uyu munhu, atizii paanobva. 30 Munhu uyu wakapingura, akati kwavari, Iri igumo kuti amuzii paanobva, kanihai wakapembenuudza madziso angu? 31 Tinozia kuti Mjari aazwi vashaishi: asi kunyazi ndiani unomuremeredza, nokuita kuda kwake, iye unomuzwa. 32 Kubvira mukutanga akuzi kumbozwicka kuti munhu wakambo pembenuudza madziso owakabarwa ari bofu. 33 Kudai uyu munhu asiri unobva kuna Mjari, aangaanaro simba rokuita ciro. 34 Uakamupingura vakati kwaari, Iwewe wakabarwa aemho mukushaisha, newe unotidzidzisa here? vakamudzinga kubanzi.

35 Jesu wakazwa kuti vaingavamudzinga kubanzi, amuona, wakati, Unotenda here Mukororo waMjari? 36 Naye wakapingura akati, Uriani, Mambo, kuti nditende kwaari? 37 Jesu wakati kwaari, Wamuwona, ndiyeze unoreketa newe. 38 Wakati, Mambo, ndinotenda. Naye wakamudira. 39 NaJesu wakati, Ndakauyira kutonga munyika muno, kwokuti vasikaoni vaone, nevanoona vaitwe mapofu. 40 Navamjeni vevaFarisi, avo vaia naye vakazwa izi, vakati kwaari Nesuwo tiri mapofu here? 41 Jesu wakati kwavari, Kudai mjaia mapofu, amusaizoano kushaisha: asi zino munoti, Tinoona, ndizo kuishaisha kwenyu kunondogara.

10 Zirokwazo, zirokwazo, ndinoti kwomuri, Uwo usikapindi ngepacimana mudanga remakwai, asi ecikwira ngeimjeni njira, iye uri mbava nedzongoni. 2 Asi uwo unopinda ngepacimana

ndiye uri muushi wemakwai. 3 Kwaari murindi unomubeurira, nemakwai anozwa izwi rake, unodaidda makwai ake ngemazina ao, aabudise. 4 Naapo aabudisa ake, unoatungamirira, nemakwai anomuteera, ngokuti anorizia izwi rake: 5 Asi aazoteeri mupara, kani anozomutiza, ngokuti aazii izwi romupara. 6 Jesu wakaereketa uyu muedzaniso kwavari; asi avazi kuzwisisa izo zaakaereketa kwavari.

7 Ndizo Jesu wakaereketa kwavari, Zirokwazo, zirokwazo, ndinoti kwomuri, inini ndiri cimana cemakwai. 8 Ueshe vakatanga pamberi pang'u vari mbava nemadzongoni: asi makwai aazi kuvazwa. 9 Inini ndiri cimana: kunyazi ndiani unopinda ndini, unozoponeswa unozopotera, unozobuda, aone kudya. 10 Mbava inouya kweg'a kuba, nokuuraya, nokuparadza: inini ndakauya kuti vaone kurarama, vakuone kakurutu. 11 Inini ndiri muushi wakanaka; muushi wakanaka unoisira pashi kupona kwake ngepamsoro pemakwai. 12 Asi iye unoshanda kuti aone mutuso, asiri muushi akadi, uwo makwai asiri ake akadi, unona tika reciuya, unosia makwai, unotiza, netika rinoabvuka nokuparadza. 13 Unotiza ngokuti uri unoshandira mutuso, aashongwi mnyoyo ngemakwai. 14 Inini ndiri muushi wakanaka, neni ndinoazia angu, naanguwo anondizia, 15 Kudai ngezaanondizia Baba, zakadaro neniwo ndinovazia Baba, neni ndinoisira pashi kupona kwangu ngepamsoro pemakwai. 16 Ndinao amneni makwai, asiri eiri dang'a, naoze kunotamika kuti

ndiaunze, nao anozozwa izwi rang'u, nao anozoita dang'a rimnero nomuushi umgewo. 17 Dgeiyi ndaa Baba vanondizia, ngokuti ndinoisira pashi kupona kwangu, kuti ndikutoreze. 18 Apana munhu unokutora kubva kwendiri, asi ndino kuisa pashi ngokwang'u. Ndine simba rokukuisa pashi, ndine simba rokukutoraze. Uyu mupango ndakaupuwa ndiBaba angu.

19 Kwaiapo kuparadzana pakati pevaJuda ngendaa yemazwi aya. 20 Nevazhinji vavo vakati, Une dimoni, unopennga; munomupurutanirenyi? 21 Uamneni vakati, Aya mazwi andiopi onunomuka nedimoni: dimoni ringapembenudza madziso ebofu here?

22 Dgouwo mukuwo kwaiapo mushongano wezituro muJerusarema, paia pacando. 23 NaJesu wakahamba mutemperi, muberere raSoromona. 24 Ndizo vaJuda vakamuunganira, vakati kwaari, Unotiita garirembo metsa rini? Kutl uri Kristu, tironzere pamhene. 25 Jesu wakavapi-ngura, Ndakamuronzera, nemni amutendi: mishando yendi noita ngezina raBaba angu, inopupura ndini. 26 Kani imnimni amutendi ngokuti amurivo akadi vemakwai angu. 27 Makwai angu anozwa izwi rang'u, neni ndinoazia, nao anonditeera, 28 Ndinoapa kupona kusikaperi, nao aazofi narini, ze akuna unoabvuka kubva munyara yang'u. 29 Baba angu uwo wakandipa ao, uri mukuru kwavari veshe, apana naumne unesimba rokuabvuka kubva munyara yaBaba angu. 30 Inini naBaba angu tiriumne. 31 VaJuda vakatonhe-

raze mapuwe kuti vamuponde. 32 Jesu wakavapingura, Ndakamuonisa mishando mizhinji yakana inobva kuna Baba; ngouri kwelyo mishando womunondiponda ngemapuwe? 33 UaJuda vakamupingura, Atikupondi ngendaa yomushando wakanaka, asi ngendaa yokutuka, nangokuti iwewuri munhu, unodziita Mjari. 34 Jesu wakavapingura, Akuzi kunyorwa here muzironzo zenyu kuti, Ndakati kuti muri vanamjari? 35 Kudai akavadaidza kuti vanamjari, avo kwarakaguma izwi raMjari, (nezinyoro azingadari-kwi,) 36 Munoereketa ngenyi ndiye, uwo waakaemesa Baba nokumutuma munyika, kuti, Unotuka Mjari, ngokuti ndakaronza kuti, Inini ndiri Mukororo waMjari? 37 Kudai ndisikati mishando yaBaba angu, musanditenda: 38 Asi kuti ndeciita, nokunyati musikatendi kwendi, tendai mishando yendinolta, kuti muzie muzwisise kuti Baba vari mukati mjangu, neni ndiri mukati mjaBaba. 39 Ndizo vakatsakaze kumubata: asi iye wakapokonyoka kubva munyara dzavo.

40 Naye wakaenda ze ruseri rwe-Jordani kundau iyo yaabapatidza Johani kutanga, wakagarapo. 41 Nevazhinji vakauya kwaari vakati, Johani aazi kuita mishamiso, asi zeshe zaakaronza Johani ngendaa youyu ziri gwinyiso. 42 Uazhinji vakamutenda apo.

11 Zino munhu wakatikuti wairwara, waizwi Razaro wBetani guta raMaria nahurwani ake Marta. 2 Waia aye Maria uwo wakadzodza Mambo ngemafuta,

akapukuta tsoka dzake ngebvudzi rake, ndiye waia nomukoma wake Razaro wairwara. 3 Ndizo hanzadzi dzake dzakatumira kwaari dzeciti, Mambo, penya, aye wounda unorwara. 4 Asi apo Jesu azwa, wakati, Uku kurwara akuri kwokuti afe akadi, asi kuri kwokurisa Mjari, kuti Mukororo waMjari airikidzwe ndikwo. 5 Zino Jesu wakamuda Marta, nomununguna wake, naRazaro. 6 Ndizo apo azwa kuti wairwara, wakagara mazuva mairi paaindofapo. 7 Nangesure kweizi wakati kuvadzidzi vake, Dgatihwirire Judia. 8 Uadzidzi vakati kwaari, Mudzidzisi, vaJuda vaitotsaka kukuponda ngemapuwe, wohwirireyoze here? 9 Jesu wakapingura, akati, Akuna here maawa arigumi namairi ngezuya? Kudai munhu ecihamba masikati aapumhunwi, ngokuti unoona kujeka kwomunyika muno: 10 Asi kudai munhu ecihamba usiku unopumhunwa, ngokuti aana kujeka mukati mjake. 11 Wakaereketa izi; ngesure kweizi wakati kwavari, Razaro shamjari yedu waata; asi inini ndinoenda kuti ndimumuse. 12 Ndizo vadzidzi vakati kwaari, Mambo, kudai akaata, unozorarama. 13 Asi Jesu waiereketa ngokufa kwake: asi ibo vaikarakadza kuti waiereketa ngokuzorora mukuata. 14 Ndizo Jesu wakati kwavari pamhene, Razaro wafa. 15 Neni ndinodakara ngepamusoro penyu kuti inga ndisipo, kuti imjimi mutende, asi ngatiende kwaari. 16 Ndizo Tomasi uwo unozwi, Manyambiri, wakati kuvadzidzi vangani vake, Nesu ngatiendewo, kuti tife naye.

17 Naapo Jesu aguma wakaona

kuti zino inga aana mazuba marongomuna arimuifa. 18 Zino Betani raia pasinde peJerusarema, kunonga mamaera mairi: 19 Nevazhinji vevaJuda vainga vaguma kuna Marta, naMaria, kuti vavaembedzere ngendaa yomukoma wavo. 20 Ndizo Marta, apo azwa kuti Jesu urikuuya, wakaenda kwooshongana naye: asi Maria wakandogara mumhatso. 21 Ndizo Marta wakati kuna Jesu, Mambo, dai wainga uri pano, mukoma wangu ingaasafa. 22 Nazino ndinozia kuti ico counozokumbira kuna Mgari, Mgari unozokupa. 23 Jesu wakati kwaari, Mukoma wako unozomukaze. 24 Marta wakati kwaari, Ndinozia kuti unozomuka mukumuka kwomushi wokupera. 25 Jesu wakati kwaari, Inini ndiri kumuka nokupona: iye unonditenda kunyazi afa, unozoponaze. 26 Nouwo unorarama, ecinditenda, aatongozofi mhera narini. Unotenda ici here? 27 Wakati kwaari, Eya Mambo; Inini ndakatenda kuti iwewe Uri Kristu, Mukororo waMgari, uwo unouya munyika. 28 Aereketa izi, wakaenda, akadaidza Maria munuguna wake ngokufishika, akati, Mudzidzisi waapano, unokudaidza. 29 Naye azwa, wakakasira kumiruka akaenda kwaari; 30 Zino Jesu wainga asati aguma muguta, asi wala acipo paakashongana naMarta. 31 Ndizo vaJuda avo vaia naye mumhatso vecimuembedzera, vaona kuti Maria wamiruka ngokukasira, akabuda, vamuteera, vecikarakadza kuti unoenda kuifa kwoocemapo. 32 Apo Maria aguma paia naJesu, amuona wakawa pashi patsoka dzake, akati kwaari,

Mambo, dai wainga pano, mukoma wangu inga asaurikafa. 33 Ndizo Jesu amuona ecicema, nevaJuda vecicema, avo vakauya naye, wakaita mahwema mumpeya mñake, wakatambudzika. 34 Wakati Mñakamuradzika pari? Dakati kwaari, Mambo, uya, uone. 35 Jesu wakacema masodzi. 36 Ndizo vaJuda vakati. Ringirai, kumudisisa kwake! 37 Asi vamgeni vavo vakati, Uyu munhu, wakashinura madziso owala ari bofu, ingaasina simba here rokuita kuti uyu munhu asafa? 38 Ndizo Jesu ecicemaze mukati mñake wakaguma kuifa: raia bako, nebuwe inga rakaridumhaidza. 39 Jesu wakati, Dusai buwe. Marta hanzadzi youwo wakafa wakati, kwaari, Mambo, zino wotonuha, ngokuti waane mazuba marongomuna afa. 40 Jesu wakati kwaari, Andizi kukuronzera here, kuti, dai wecitenda, unggazona utende hwaMgari? 41 Ndizo vakadusa buwe. NaJesu wakamirudza madziso ake mudenga, akati, Baba, ndinokutenda ngokuti wandizwa. 42 Neni ndinozia kuti unondizwa ngengucadzeshe: asi ngepamsoro pembungano yakaema pasinde ndaereketa kudaro, kuti itende kuti ndiwe wakandituma. 43 Naapo aereketa izi wakadaidzira ngezwi guru, Razaro, buda. 44 Uwo wainga akafa wakabuda, akasungwa tsoka nenyara ngemacira okuikwa nawo, nehope yake yakasungwa nayo ngejira doko. Jesu wakati kwaari, Musunhurenyi, mumurekere aende.

45 Ndizo vazhinji vevaJuda avo vakauya kuna Maria, veciona izo zaakaita, vakamutenda: 46 Asi

vamneni vavo vakaenda kuvaFarisi, vakavaronzera zaaingga aita Jesu.

47 Ndizo vapristi vakuru nevaFarisi vakaungana pamnepo kuita bangano, wakati, Tinozoitenyi? ngokuti uyu munhu unoita mishamiso yakawanda. 48 Kudai tecimurekera vanhu veshe vanozotenda kwaari, nevaRoma vanozouya vati-bvukire zeshe ndau yedu nedzinza redu. 49 Asi umnje wavo Kaiafasi, ari mupristi mukuru ngegorerero, wakati kwavari, Amuzii ciro naci-mnje. 50 Nokuti kukarakadza kuti kunotamika kuti munhu umnje afe ngepamsoro pevanhu, kwokuti dzinza reshe risapera. 51 Asi izi aazi kudziereketera, asi ngokuti waia ari mupristi mukuru ngegorerero, wakaprofeta kuti Jesu unozofira dzinzero. 52 Asi haiwa kufira dzinzero kwegga, asi kuti aungandzewo pamnepo vana vaMhari avo vakaparadzika kunyika dzeshe, kuti vaite umnje. 53 Ndizo kubvira ngezuya iro vakaita bangano pamnepo rokuti vamuuraye.

54 Ndizo Jesu aazi kucahambaze pamhene pakati pevaJuda, asi kubva apo wakaenda kunyika iri pasinde norukaro, kudoropa rinozwi Efraemu, naapo wakagara nevadzidzi vake. 55 Nepasika re-vaJuda raia pasinde, vazhinji vakakwira Jerusarema, vecibva munharaunda, pasika risati raguma, kwokuti vadzicenese. 56 Ndizo vakamutşaka Jesu, vecibvunzana vakaema mutemperi, veciti, Munotinyi? kuti aazouyi here kumushongano wokudya? 57 Ndizo vapristi vakuru nevaFarisi vaingga vakaita mupango kuti kunyazi ndiani unozia paari, ngaaronze, kuti vamubate.

12 Ndizo mazuva matanhatu pasika risati raguma, Jesu wakaguma Betani, apo paia na-Razaro, uwo waakamusa kwavakafa. 2 Ndizo vakamuitira kudya apo, naMarta wakavaburira, asi Razaro waia umnje weavo vaitseama naye pakudya. 3 Naapo Maria wakatora paundi remafuta okuzora enarde aikosha, wakadzodza tsoka dzaJesu, akapukuta tsoka dzake ngebvudzi rake. Nemhatso yakazara ngomnema wemafuta. 4 Asi Judasi Isikarioti, umnje webadzidzi vake, uwo waizo mupira, wakati; 5 Kwarekerwa ngenyi kutengisa mafuta aya ngepondo dziri gumi neshanu, dzipuwe varombo? 6 Izi wakaziereketa kusiri kuvada varombo, asi ngokuti waia mbava, waingwarrira nyede, naye waitora zaliswemgo. 7 Ndizo Jesu wakati, Murekerei: waida kungwaririra aya metsa zuva rokuikwa kwangu. 8 Ngokuti varombo munavo nguva dzeshe, asi amuneni akadi nguva dzeshe.

9 Ndizo vazhinji vembungano yavaJuda vakazia kuti walapo, naovo vakauya, sandikwo kwokuti vaone Jesu kwegga, asi kuti vaone Razaro, aye waakamusa kubva kwavakafa. 10 Asi vapristi vakuru vakapangana kuti vauraye naRazarowo; 11 Ngokuti ngepamsoro pake vazhinji vevaJuda vakaenda vakatenda kuna Jesu.

12 Necimangwani mbungano huru, iyo yakauya kumushongano wokudya, apo yazwa kuti Jesu wouya Jerusarema. 13 Yakatora matai emicindwi, yakabuda kwoshongana naye, vakaidzira, veciti, Hosana, unomucena uwo unouya ngezina raMambo, ari-

Mambo waisraeri. 14 NaJesu aone mbongora itsha, wakagada padera payo, kudai ngezezakanyorwa, 15 Usatya, iwewe mukunda weZioni: ringira, mambo wako unouya, akagada padera petsiru rembongora. 16 Izizi vadzidzi vake avazi kuzwisisa pakutanga, asi apo Jesu airikidzwa, vakacizoceredza, kuti izi zainga zakanyorwa ndiye, nokuti vakamuitira izizi. 17 Nembungano iyo yaia naye apo akadaidza Razaro kubva muifa akamumusa kwevafa, yakaita ucapupu. 18 Dgeiyi ndaa mbungano yakaenda kwooshongana nayeze, ngokuti yainga yazwa kuti wakaita uyu mushamiso. 19 Ndizo vaFarisi vakaereketa pakati pavo, kuti, Ringirai, amungaiti ciro: penyai nyika yeshe inomuteera.

20 Kwaiapo vaGreki vakatikuti pakati peavo vakakwira kwoodira kumushongano wokudya; 21 Ndizo ava vakaguma kuna Firipu, uwo waiwa weBetisaida reGarire, vakakumbira kwaari, veciti, Cangamire, tinoda kuona Jesu. 22 Firipu wakauya, akaronzera Andreu; Andreu naFiripu vakamuronzera Jesu. 23 NaJesu wakapingura, eciti, Dguva yaguma kuti Mukororo womunhu airikidzwe. 24 Zirokwazo, zirokwazo, ndinoti kwomuri, Kudai tsangu yekoroni isikawi mumavu nokufa, inondogara iri yega, asi kuti ikafa, inozobereka tsangu dzakawanda. 25 Iye unoda kupona kwake, unozokurasha; asi iye unokunyanya kupona kwake munyika muno, unozokungwaririra kupona kusikaperi. 26 Kudai munhu ecindishandira ngaanditeere; nependiri

naye muranda wangu unozoapowo: kuti munhu ecindishandira, iye unozoremeredzwa ndiBaba. 27 Zino mneya wangu unoneseka; neni ndinozotinyi? Baba ndiponese kubva kuneiri awa. Asi ngeiyi ndaa ndakauyira awa iri. 28 Baba, irikidza zina rako. Apa-po rakauya izwi recibva mudenga, reciti, Ndakaririkidza, neni ndinozoriirikidzaze. 29 Nembungano yainga yakaema apo, yairizwa, yakati, Inotinhira: vamneni vakati, Ingirosi yaereketa naye. 30 Jesu wakapingura, akati, iri izwi arizi kuguma ngepamsoro pangu, asi ngepamsoro penyu. 31 Zino kwaguma kutongwa kwenyika iyi; zino muzare wenyika iyi unozorashwa kubanzi. 32 Neni kudai ndecizomirudzwa panyika, ndinozokweya veshe vanhu kwendiri. 33 Wakaereketa ici ecipangidzira njira yokufa kwaazofa ndikwo. 34 Ndizo mbungano yakamupingura, Takazwa muzironzo kuti, Kristu unozogara kunoti narini, hino unoita maronzerenyi kuti Mukororo womunhu unotamika kuti amirudzwe? Ndiani uyu Mukororo womunhu? 35 Jesu wakati kwavari, inguva doko kujeka kucipo pakati penyu. Hambai mucinokujeka kuti cidima cisamubata: nouwo unohamba mucidima aatongozii paanoenda. 36 Mucinokujeka, tendai kujeka, kuti multe vana vokujeka. Jesu wakaereketa izi, akabva apo akadzifisha kubva kwavari. 37 Nokunyati ainga aita mishamiso mizhinji pamberi pavo, kani avazi kumutenda: 38 Kwokuti izwi raIsaya muprofeti rizarisike, iro rinoti, Mambo, ndiani wakatenda izwi redu, nomuoko

waJehova wapangidzirwa kunani? 39 Dgenda yeici ingavasina simba rokutenda, ngokuti Isaya unotize, 40 Iye wakapofumadza madziso avo, wakakbnjisa mnyoyo yavo, kuti vasazoon ngemadziso avo, vasazia ngomnyoyo yavo, vattenderuke, ndivamhodyose. 41 Izi Isaya wakaziereketa apo aona utende hwake, akaereketa ndiye. 42 Kani pakati pemadzimambo vazhinji vakamutenda, asi ngenda yavaFarisi avazi kumutenda ngomumromo, kuti vasadingwa kubva mumhatso yokudira: 43 Dgokuti vaipinda kuda kuirikidzwa ngevanhu kuno kuirikizwa ndiMnari.

44 Jesu wakadaidzira, akati: Iye unonditenda, aatendi inini akadi, asi unotenda kwaari wakandituma. 45 Nouwo unondiona, unoona wakandituma. 46 Inini ndakauya ndiri kujeka munyika, kuti nokunyati ndiani unotenda kwendi asacagara mucidima. 47 Kunyazi ndiani unozwa mazwi angu, asikaatendi, andimutongi inini; ngokuti andizi kuuya kutinga nyika asi kuti ndiponese nyika. 48 Iye unondiramba asikaashiri mazwi angu, unaye unomutonga: Izwi iro rendakaereketa, ndiro rinozomutonga ngomushi wokupepa. 49 Dgokuti andizi kutera kudziereketera; asi Baba uwo wakandituma iye wakandipanga cendinozoronzwa, necendinozereketa. 50 Neni ndinozia kuti mupango wake uri kupona kusikaperi: ndizo izo zendinoereketa, ndinoziereketa kudai ngezandakaronzerwa ndiBaba.

13 Zino kusati kwaguma kudya kwepasika, Jesu ecizia

kuti nguva yake yaguma kuti abve munyika muno, aende kuna Baba, avada vake avo vari munyika, wakavada metsa mukupera. 2 Kucadyiwa, Satani inga atopinda mumnyoyo mnaJudasi Isikarioti mukororo waSimoni, kuti amupire; 3 Ecizia kuti Baba ainga amupa zeshe munyara dzake, nokuti wakabvo kuna Mnari, nokuti unoenda kuna Mnari; 4 Wakamiruka kubva pakudya, wakakumura zokupfeka zake, wakatora jira rokupukuta ndiro, akadzisimidza ndiro; 5 Naapo wakadurura mvura mndiro, akatanga kusuka tsoka dzevadzidzi, nokudzipukuta ngejira rainga akasimirero. 6 Ndizo wakaguma panaSimoni Petro: aye wakati kwaari, Mambo, Iwewe unosuka tsoka dzangu here? 7 Jesu wakapingura, akati kwaari, Ico cendinoita, autocizii zino, asi unozocizia ngesure kweizi. 8 Petro wakati kwaari, Aungasuki tsoka dzangu narini. Jesu wakapingura Dai ndisikakusuki, auna ugaro neni. 9 Simoni Petro wakati kwaari, Mambo, kusacaita tsoka dzangu dzega asi nadzo nyara dzangu nesoro rangu. 10 Jesu wakati kwaari, Iye wasukwa aacatami ciro cimneni kwega kusuka tsoka dzake, asi waceneswa aemho: nemni muri vaceneswa, asi haiwa mgeshe. 11 Dgokuti waimuzia uwo walzomupira, ndizo wakati, Amuzi kuceneswa mgeshe.

12 Ndizo apo ainga asuka tsoka dzavo, nokutora zokupfeka zake, nokugara pashize, wakati kwavari, Munozia here cendamuitira? 13 Munondidaidza kuti, Mudzidzisi, nokuti Mambo, nemni munonasa

kuronza; ngokuti ndiriye. 14 Ndi-
zo kudai inini Mambo noMudzi-
dzisi, ndasuka tsoka dzenyu, ne-
mjiwo kunotamika kuti musukane
tsoka dzenyu: 15 Ngokuti nda-
mupa clonero, kuti nemji multe
kudai ngezandaita kwomuri. 16
Zirokwazo, zirokwazo, ndinoti
kwomuri, Muranda aatongopindi
mambo wake, ze nowakatumba
aatongopindi uwo wakamutuma.
17 Kudai mjecizia izi, munomu-
cena kudai mjeciziita. 18 Andie-
reketi ndimji mjeshe akadi; ndi-
novazia avo vendakatsanangura:
asi kuti cinyorwo cizarisike, cinoti,
Aye unodya cingwa cangu, waka-
ndimirudzira cisisinho cake ku-
rwisana neni. 19 Kubvira zino
ndinomuronzera zisati zaitika, kuti
zaitika mutende kuti ndiriye.
20 Zirokwazo, zirokwazo, ndinoti
kwomuri, Iye unoashira uwo we-
ndinotumba unoashira inini; nouwo
unondlashira, unoashira uwo wa-
kandituma.

21 Apo Jesu aingga aereketa izi
wakatambudzika mumjeya mja-
ke, wakapupura akati, Zirokwazo,
zirokwazo, ndinoti kwomuri, kuti
umje kwomuri unozondipira.
22 Vadzidzi bakaringirana veci-
tsutsumja kuti unoereketa ndiani.
23 Waiapo umje wavadzidzi vake
waiingga akatseama paditi raJesu
waldiwa ndiJesu. 24 Ndizo Si-
moni Petro wakamukopera kuti
abvunze kwaari, kuti ndiani waa-
noereketa ndiye. 25 Ndizo uwo
wakatseama paditi raJesu wakati
kwaari, Mambo, ndiani? 26 Ndi-
zo Jesu wakapingura, Ndiye uwo
wendinozosheya mushuva ndi-
mupe. Naapo asheya mushuva
wakaupa Judasi Isikarioti muko-

roro waSimoni. 27 Nangesur
kwomushuva, Satani wakapoter
kwaari. Ndizo Jesu wakati kwaari,
Ico counolta ciita ngokukasira.
28 Kwala kusina munhu pakudya
wakazia singwisingwi yezaakaere-
keta kwaari: 29 Ngokuti vamjeni
vaipinimidza kuti, ngokuti Judasi
wala nenyede kuti Jesu wakati
kwaari, Tengga zetinotama mupa-
sika; nokuti ahine ciro kuvarombo.
30 Ndizo iye aashira mushuva
paripo wakabuda kuenda: ingga
hwaausiku.

31 Ndizo, apo abuda, Jesu wa-
kati, Zino Mukororo womunhu
unoirikidzwa, naMjari unoiriki-
dzwa mukati mjaake: 32 Kudai
Mjari ecizoirikidzwa mukati mja-
ake, Mjari unozomuirikidzaze mu-
kati mjaake emene, naye unozo-
muirikidza paripo paripo. 33 Uana
vadoko, inguva doko ndicinemji:
munozonditsaka, nokudai ngeze-
ndakaereketa kuvaJuda, kuti, Pe-
ndinoenda, amuna simba rokuu-
yapo, nazino ndinoronza kudaro
kwomuri. 34 Cironzo citsha ndino-
mupa kuti mudane. Kudai ndini
ndakamuda ngokudaro imjimji-
wo mudane. 35 Dgeici veshe vano-
zozia kuti imjimji muri vadzidzi
vangu, kudai muno rudo umje
kwoumjeni.

36 Simoni Petro wakati kwaari,
Mambo, uno enda kuri? Jesu wa-
kapingura, Pendinoenda, aunasi-
mba rokunditeera zino, asi uno-
zoteera sure kwelzi. 37 Petro wa-
kati kwaari, Mambo, andina simba
rokukuteera zino ngenyi? Ndino-
zofa ngepamsoro pako. 38 Jesu
wakapingura, Unozofa ngepa-
msoro paggu here? Zirokwazo,
zirokwazo, ndinoti kwomuri, jo-

ngwe arizorirĩ usati wandiramba katatu.

14 Mŋoyo wenyu usatambu-dzika; tendai kuna Mŋari, munditendeiwo. 2 Mumhatso mŋaBaba angu huriyo ugaro hwa-kawanda: kudai zisakadaro, inga ndakamuronzera; ngokuti ndino-enda kwoomunasirira ugaro. 3 Kudai ndecienda kwoomunasirira ugaro, ndinozouyaze, nokumua-shira ndemene, kuti pendiri, nemŋi mungazoapowo. 4 Nependi-noenda munoziya njira. 5 Tomasi wakati kwaari Mambo, atizii pounoenda; nenjira tingaizia ngenyi? 6 Jesu wakati kwaari, Inini ndiri njira, negwinyiso, nokupona: akuna unouya kuna Baba, asikauyi ndini. 7 Kudai mŋaindizia inga mŋakamuzia Baba anguwo. Kucibvira pano munomuzia, nemŋi mŋakamuona. 8 Firipu wakati kwaari, Mambo, tipangidzire Baba, nesu tikwaniswe. 9 Jesu wakati kwaari, Ndakagara newe mu-kuwo wakadai kureba, asi ausati wandizia here, Firipu? iye wakan-diona inini wakaona naBaba: unoronza ngenyi kuti, Tipangidzire Baba? 10 Autendi here, kuti inini ndiri mukati mŋaBaba, naBaba vari mukati mŋangu? Mazwi endinoereketa kwomuri, andidzie-reketeri: asi Baba vanogara mu-kati mŋangu ndivo vanoita mishan-do yavo. 11 Tendai inini kuti ndiri mukati mŋaBaba, naBaba vari mukati mŋangu, kani kuti musikatendi kudaro, tendai inini ngepamsoro pemishando yemene. 12 Zirokwazo, zirokwazo, ndinoti kwomuri, iye unonditenda, mi-shando yendinoita, unozoitawo,

nemishando mikuru kune iyi uno-zooita, ngokuti inini ndinoenda kuna Baba. 13 Nokunyati cinyini comunozokumbira ngezina rangu, ndinozociita, kuti Baba airikidzwe ngoMukororo. 14 Kudai mŋa-nyazokumbirenyi kwendiri nge-zina rangu, inini ndinozociita. 15 Kudai mŋecindida, munozo-gwarira mipango yangu. 16 Neni ndinozokumbira kuna Baba naye unozomupa umŋeni Muembedzeri, kuti agare nemŋi kusikaperi. 17 Mŋeya wegwinyiso, uwo aungaa-shirwi ngenyika; ngokuti aiuoni, aluziize: asi imŋimŋi munouzia, ngokuti unogara nemŋi, unozo-gara mukati mŋenyu. 18 Andizo-musii muri nherera, ndinozouya kwomuri. 19 Kucinenguva doko nenyika aicandioni, asi imŋimŋi munondiona, ngokuti inini ndino-pona nemŋiwo munozopona. 20 Dgeiro zuta munozozia kuti inini ndiri mukati mŋaBaba angu, nei-mŋimŋi muri mukati mŋangu, neni ndiri mukati mŋenyu. 21 Iye unemipango yangu, eciingwarira, iye ndiye unondida: nouwo unon-dida: unodiwa ndiBaba angu, neni ndinozomuda, ndidzionise kwaari. 22 Judasi, (asiriye Isika-rioti,) wakati kwaari, Mambo, zinoita ngenyi kuti unozodzionisa kwetiri, usikadzionisi kunyika? 23 Jesu wakamupingura, akati kwaari, Kunyazi ndiani unondida unozongwarira mazwi angu, na-Baba angu vanozomuda, nesu tinozouya kwaari, tiite ugaro hwe-du pamŋepo naye. 24 Iye usika-ndidi, aangwariri mazwi angu: nezwi romunozwa anggerangu aka-di, asi ngeraBaba angu avo vakan-dituma.

25 Izi ndamuronzera ndicakagara nemŋi. 26 Asi Muembedzeri, Mŋeya Wakacena, uwo wanozotuma Baba ngezina rangu, iye unozomudzidzisa ziro zeshe, amucerecedzise zeshe zendakamuronzera. 27 Kunyarara ndinokusia kwomuri; kunyarara kwangu ndinomupa: Andimupi kudai ngokupa kwenyika. Mŋoyo yenyu isatambudzika, isakarukaze. 28 Mŋazwa kuti ndati kwomuri, ndinoenda, neni ndinozouyaze kwomuri. Kudai mŋaindida mŋaizodakara ngokuti ndinoenda kuna Baba, ngokuti Baba vari mukuru kwendiri. 29 Zino ndamuronzera zisati zaitika, kuti apo zazoitika mutende. 30 Dgesure kweizi andicazoereketi kakurutu nemŋi; ngokuti muzare wenyika iyi unouya, naye aana ciro mukati mŋangu. 31 Asi kuti nyika izie kuti ndinomuda Baba, nokudai ndiBaba wakandipa mupango ngokudaro ndinoita. Mirukai, ngatibve pano.

15 Inini ndiri muvini wecakwadi, naBaba angu murimi. 2 Matai eshe ari mukati mŋangu, asikaŋereki micero, unoadusa, nao eshe anobara micero unootongora kuti abare micero yakapinda kuwanda. 3 Imŋimŋi muri vakatoceneswa ngezwi rendakaereketa kwomuri. 4 Garai mukati mŋangu, neni mukati mŋenyu. Kudai ngedai risina simba rokuŋereka micero remene, risikagari mukati mŋomuvini, zakadaro nemŋi kudai musikagari mukati mŋangu. 5 Inini ndiri muvini, imŋimŋi muri matai: iye unogara mukati mŋangu, neni ndiri mukati mŋake, ndiye unobereka micero yakawa-

nda, ngokuti ngepabanzi pangu imŋimŋi amungakoni kuita ciro. 6 Kunyazi ndiani usikagari mukati mŋangu, unorashwa kudai ngedai, rinofota, navo vanoauganidza vaposhere mumuriro, nao anotsa. 7 Kudai mŋecigara mukati mŋangu, nemazwi angu anogara mukati mŋenyu nemŋi munozokumbira ico comunoda, naco cinozoitwa kwomuri. 8 Dgeici Baba angu vanoirkidzwa, kuti muŋare micero yakawanda, ngokudaro munozoita vadzidzi vangu. 9 Kudai ndiBaba vakandida, zakadaro neni ndakamudawo: garai murudo rwangu. 10 Kudai mŋecingwarira mipango yangu, munozogara murudo rwangu; kudai ndini ndakangwarira mipango yaBaba angu, nokugara murudo rwake. 11 Nda-kaereketa izi kwomuri kuti kudakara kwangu kugare kwomuri, nokuti kudakara kwenyu kuzarisike. 12 Uyu ndiwo mupango wangu, kuti mudane, kudai ndini ndakamuda. 13 Akuna munhu unorudo rukuru kuno urwu, kuti munhu afe ngepamsoro peshamŋari dzake. 14 Imŋimŋi muri shamŋari dzangu kudai mŋeciita izo zendinomupangira. 15 Andicamudaidzi kuti muri varanda, ngokuti muranda aazli cinoitwa ndiMambo wake: asi ndakamudaidza kuti muri shamŋari; ngokuti zeshe zendakazwa kunaBaba angu, ndakazizisa kwomuri. 16 Imŋimŋi amuzi kunditsanangura, asi ndakamutsanangura inini, ndikamuemesa kuti muende, muŋereke micero, nokuti micero yenyu igare: kuti kunyazi cinyini comunozokumbira kuna Baba ngezina rangu, vacihine kwomuri. 17 Izi

ndinomupanga kuti mudane. 18 Kudai nyika yecimunyanya, munozia kuti yakatanga kundinyanya inini. 19 Kudai mŋaia vomunyika, nyika yaizoda bayo: asi ngokuti amuri vomunyika akadi, asi ngokuti ndakamutsanangura kubva munyika, ndizo nyika inomunyanya. 20 Karakadzai izwi iro re-ndakaereketa kwomuri, kuti, Muranda aatongopindi Mambo wake. Kudai vakandishononesha inini, vanozomushononesawo: kudai vakangwarira izwi ranggu, vanozongwarira nerenyuwo. 21 Kani zeshe izi vanozomuitira ngendaa yezina ranggu, ngokuti avamuzii uwo wakandituma. 22 Kudai ndisikazi kuuya ndikaereketa kwavari, avasaliza nokushaisha: asi zino avacina cokutenda murandu ngokushaisha kwabo. 23 Uwo unondinyanya, unonyenyawo Baba angu. 24 Kudai ndisakaita pakati pavo mishando iyo isikazi kumboitwa ngoumŋeni, vangadai vasina kushaisha: asi zino vakaona vakanyanya teshe inini naBaba angu. 25 Asi kuti izwi rizarisike iro rakanyorwa muzironzo zavo, rokuti, Vakandinyanya, pasina ndaa. 26 Asi apo aguma Muembedzeri, uwo wendinozotuma kwomuri ecibva kuna Baba, Mŋeya wegwinyiso, unobva kuna Baba, iye unozopupura ndini; 27 Nemŋize munozopupura, ngokuti mŋaia neni kubvira mukutanga.

16 Ndakaereketa izi kwomuri kuti musapumhuni swa. 2 Vanozomudzanga kubva mhatso dzavo dzokudira: eya, nguva inouya apo munhu weshe, unozomuuraya, unozopinimidza kuti

unomushandira Mŋari. 3 Nayo vanozoita izi ngokuti avazi kumuzia Baba, nokuti inini. 4 Asi ndakamuronzera izi, kuti, apo yaguma nguva yazo, mucerecedze kuti ndakamuronzera ndizo. Asi andizi kumuronzera izi kubvira pakutanga, ngokuti ndainga ndicinemŋi. 5 Asi zino ndinoenda kuno uwo wakandituma; akuna naumŋe wenyu unondibvunza, kuti, Unoenda, kuri? 6 Kani ngokuti ndakaereketa izi kwomuri, mŋoyo yenyu yazara ngokusururika. 7 Asi ndinomuronzera gwinyiso; kuti za kamunakira kuti ndiende: ngokuti kudai ndisikaendi, Muembedzeri aazouyi kwomuri: asi kudai ndikaenda, ndinozomutuma kwomuri. 8 Naye apo auya unozotenhisa nyika ngendaa yokushaisha, nangokururama, nangokutonga. 9 Ngendaa yokushaisha ngokuti avanditendi; 10 Ngendaa yokururama ngokuti ndinoenda kuna Baba, nemŋi amucazondioni; 11 Ngendaa yokutonga ngokuti muzare wenyika ino wakatongwa. 12 Ndicine zizhinji zokumuronzera, asi amusati mŋaane simba rokuzizwisisa zino. 13 Asi apo iye auya, Mŋeya wegwinyiso, unozomuratidza gwinyiso reshe: ngokuti aazodziereketeri, asi zaanozwa, ndizo zaanozoereketa, naye unozomupangidzira zinozouya. 14 Uwo unozondiirikidza, ngokuti unozoa-shira zokwangu, nokuziziisa kwomuri. 15 Zeshe zaana zo Baba ngezangu; ndizo ndakati kuti, Unozoashira zokwangu, nokuzipangidzira kwomuri. 16 Inguva doko nemŋi amucazondioni, nenguva dokoze nemŋi munozondiona. 17 Umŋeni vevadzidzi vake va-

kaereketa pacavo, veciti, Cinyini ici caanoereketa kwetiri, kuti, Inguva doko nemŋi amucazon-dioni, nenguva dokoze nemŋi munozondiona, ecitize, Dgokuti ndinoenda kuna Baŋa? 18 Ndiŋo vakati, Cinyini ici caanoereketa, kuti, Inguva doko? Atizii kuti unoronzenyi. 19 Jesu waizia kuti valda kumubvunza, naye wakati kwavari, Munobvunzana here pakati penyu, ngeico cendaronza, kuti, Inguva doko nemŋi amucazon-dioni, nenguva dokoze, nemŋi munozondiona? 20 Zirowazo, zirowazo, ndinoti kwomuri, kuti munozocema nokuŋoorera, asi nyika inozodakara: imŋimŋi munozotambudzika, asi kutambudzika kwenyu kunozotsandudzwa kuita kudakara. 21 Dzimai ropotwa ngokubereka rinotambudzika, ngokuti nguva yaro yaguma: asi raŋberaka mŋana, aricakaradzi ngokurwadziwa, ngendaa yokudakara kuti mŋanarume waŋarwa munyika. 22 Nemŋi munozotsumba ŋino, asi ndinozomuonaze nemŋoyo yenyu inozodakara, nokudakara kwenyu akuna munhu unokudusa kubva kwomuri. 23 Dgeiro zuva amuzondibvunzi ciro. Zirowazo, zirowazo, ndinoti kwomuri, Nokunyati cinyini comunozokumbira kuna Baŋa ngezina ranggu, unozocihina kwomuri. 24 Metsa ŋino amuzi kukumbira ciro ngezina ranggu: kumbirai nemŋi munozoa-shira kuti kudakara kwenyu kuza-risike.

25 Ndakaereketa izi kwomuri ngemiedzaniso, asi nguva inouya apo andicazoereketi kwomuri ngemiedzaniso, asi ndinozomupangidzira pamhene ndiBaŋa. 26 Dgei-

ro zuva munozokumbira ngezina ranggu, neni andironzi kwomuri kuti ndinozomukumbirira kuna Baŋa; 27 Dgokuti Baŋa emene unomuda, ngokuti imŋimŋi mŋakandida, nemŋi mŋakatenda kuti ndakabva kuna Mŋari. 28 Ndakabva kuna Baŋa, ndakaguma munyika; ze, ndinosia nyika, ndiende kuna Baŋa. 29 Uadzidzi vake vakati kwaari, Ringira ŋino worowoe-reketa pamhene, aucaereketi ngemiedzaniso. 30 ŋino tinozia kuti unozia zeshe, autami kuti munhu naumŋe akubvunze: ngeici tinotenda kuti iwewe wakabva kuna Mŋari. 31 Jesu wakavapingura, eciti, ŋino munotenda here? 32 Ringirai, nguva inouya, eya yatoguma, kuti munozoparadzwa uwo nouwo kune zakwe, nokundisia ndega: kani andiri ndega akadi: ngokuti Baŋa uneni. 33 Izi ndakamuronzera kuti kwendiri muone kunyarara. Munyika munozoa nenyatwa: asi shingai mŋoyo, ndainyisa nyika.

17 Jesu wakaereketa izi, wakamirudza madziso ake mudenga, akati, Baŋa, nguva yaguma: Irikidza Mukororo wako, kuti Mukororo wako akuirikidze: 2 Kudai ngezewakamupa simba padera penyama yeshe, kwokuti veshe vovakamupa, iye avape kupona kusikaperi. 3 Uku ndikwo kupona kusikaperi, kuti vakuzie iwewe Mŋari wega wegwiniso, naJesu Kristu uwo wowakaturna. 4 Nda kakuirikidza munyika; ndakapedza mushando wowakandipa kuti ndiuite. 5 Nazino, iwewe Baŋa, ndiirikidze wemene ngokuirikidzwa ukwo kwendaia nakwo

newe, ngepamberi nyika isati yaa-po. 6 Ndakapangidzira zina rako kuna avo vanhu vovakandipa kubva munyika: vaia vako, newe wakavahina kwendiri, navo vakaringwarira izwi rako. 7 Zino vanoziya kuti zeshe zewakandipa zakabva kwouri: 8 Dgokuti mazwi ovakandipa ndakaapawo kwavari, navo vakaashira, vakazia ngegwiniso kuti ndakabva kwouri, vakatenda kuti iwewe wakandituma. 9 Ndinovakumbirira; andikumbiriri nyika, asi avo vovakandipa, ngokuti vari vako. 10 Nazeshe zangu ngezako nezako ngezangu: neni ndinoirikidzwa ndivo. 11 Andicimho akadi munyika, asi ava vaciri munyika, neni ndouya kwouri. Baba Uakacena, vangwarire ngezina rako, avo vovakandipa: kuti vazoita umhe kudai tisu. 12 Apo ndicinavo ndakavangwarira muzina rako, avo vovakandipa: ndakavarinda, akuna nau-mhe wavo wakatsakatika, kwega mukororo wokurashwa, kuti zinyoro zizarisike. 13 Nazino ndinouya kwomuri, nezi ndinoereketa munyika kuti kudakara kwangu kuzarisike mukati mnavo. 14 Ndakahina kwavari izwi rako, nenyika yakavanyenya, ngokuti avari venyika akadi, kudai ndini andiri wenyika akadi. 15 Andikumbiri kuti muvaduse kubva munyika, asi kuti muvangwarire kubva kuno uwo wakashata. 16 Avari venyika akadi, kudai ndini andiri wenyika. 17 Vacenese ngegwiniso: izwi rako riri gwinyiso. 18 Kudai ngezovakandituma munyika, ngokudaro neniwo ndinovatuma munyika. 19 Dgepamsoro pavo ndinodzicenesa, kuti navowo vaceneswe

ngegwiniso. 20 Andivakumbiriri ava vega, asi naavo vanozotenda kwendiri ngezwi ravo. 21 Kutiveshe vaite umhe, kudai ndiwe Baba uri mukati mangu, neni ndiri mukati mako, kuti navo vage-re mukati mgedu, kuti nyika itende kuti iwewe wakandituma. 22 Noutende, hwovakandipa, ndakahupawo kwavari; kuti vaite umhe kudai tisu tiriumhe. 23 Inini mukati mnavo, newe mukati mangu, kuti vaitwe vakaperera vari umhe: kuti nyika izie kuti iwewe wakandituma, nokuti unovada kudai ngezounondida inini. 24 Baba, vovakandipa ndinoda kuti vaapo pendiri kuti varingire utende hwangu, uhwo hwovakandipa inini: ngokuti wakandida nyika isati yaemeswa. 25 Baba vakarurama, nyika aizi kukuzia asi inini ndinokuzia; naava vakazia kuti iwewe wakandituma; 26 Neni ndakavaziisa zina rako, neni ndinozoriziisa, kuti rudo urwo rwo-wakandida ndirwo rugare mukati mnavo, neni mukati mnavo.

18 Apo Jesu aing'a aereketa izi, waka-buda nevadzidzi vake vakaambuka ruseri rwomukova Kedroni, apo paia nomunda, iye wakapoter'a mukati mnavo nevadzidzi vake. 2 NaJudasi uwo wakamupira, waizia ugarohwo, ngokuti Jesu walunganomho kazhinji nevadzidzi vake. 3 Ndizo Judasi aashira cikwata, nevatingamiriri kubva kuvapristi vakuru nevaFarisi, vakagumapo, vanezi-veneko, namasasi nezokurwa ndizo. 4 Ndizo Jesu ecizia zeshe zinozomugumira, waka-budira kwavari, akati kwavari, Munotsaka

anani? 5 Ukamupingura, Jesu weNazareta. Wakati kwavari, Ndini. NaJudasize uwo wakamupira, waing'a akaema navo. 6 Ndizo apo avaronzera kuti, Ndini, vakaita pfundamutete, vakawa pashi. 7 Ndizo wakavabvunzaze, akati, Munotsaka anani? navo vakati, Jesu weNazareta. 8 Jesu wakavapingura, Ndamuronzera kuti ndini: ndizo kuti mjecitsaka inini, rekerai ava vaende. 9 Kuti izwi rizarisike, iro rinoti, Avo vovakandipa andizi kurashikirwa naumne wavo. 10 Ndizo Simoni Petro ing'a aneshoti, wakaishwamura, wakatema muranda womupristi mukuru, akagura nzee yake yokumudyo: zina romuranda uwo raia Marikusi. 11 Ndizo Jesu wakati kuna Petro, Hwirinza shoti yako mumakara ayo: tsani yaakandipa Baba, andizoimni here?

12 Ndizo cikwata nenduna nevatungamiriri vevaJuda vakabata Jesu, vakamusunga, 13 Navo vakamuunza kutanga kuna Anasi: ngokuti iye waia muzere waKaiafasi, uwo waia mupristi mukuru ngegorerero. 14 Zino Kaiafasi ndiye wakanyowedza vaJuda kuti kwaidfikana kuti munhu umne afire vanhu.

15 Asi Simoni Petro wakamuteera Jesu, nomudzidzi umneni. Zino uwo mudzidzi waziikanwa kumupristi mukuru, naye wakapotera naJesu muruanze rwomupristi mukuru. 16 Asi Petro wakaema pasiwo kubanzi. Ndizo mudzidzi umneni uwo waiziikanwa kumupristi mukuru wakabufda pabanzi akaereketa kunouwo waingwarira musiwo, akapotedza Petro. 17 Ndizo musikana uwo

waingwarira musiwo, wakati kuna Petro, Newe auri umne here wevadzidzi vouyu munhu? Wakati, Andiriye akadi. 18 Navaranda nevatungamiriri vakaema apo, vakabasa muriro wamasimbe; ngokuti kwaia necando; vaiota: naPetro wakaema navo eciota.

19 Ndizo mupristi wakabvunza Jesu ngendaa yavadzidzi vake, nangokudzidzisa kwake. 20 Jesu wakamupingura Inini ndakaereketa pamhene kuvanhu venyika: nguva dzeshe ndaidzidzisa mumhatso dzokudira, nomutemperli apo palungana veshe vaJuda, andizi kuereketa ciro ngokufishika. 21 Unondibvunzirenyi? Bvunza avo vakandizwa, cendakaereketa kwavari: ringira, avo vanoziya zendakaereketa inini. 22 Naapo aing'a aereketa izi umne wevatungamiriri vaing'a vakaema apo wakamurova Jesu ngorupi eciti, Unopingura mupristi mukuru kudaro here? 23 Jesu wakamupingura, Kudai ndaereketa zakashata, pupurira ngezakashatezo; asi kudai zanaka, unondiroverenyi? 24 Ndizo Anasi wakamutumira akasungwa kuna Kaiafasi mupristi mukuru.

25 NaSimoni Petro wakaema eciota. Ndizo vakati kwaari, Newe auri umne here wevadzidzi vake? Iye wakavapingura, akati, Andiriye. 26 Umne wevaranda vomupristi mukuru waia hama youwo waakatema nzee Petro, wakati, Andizi kukuona unaye mumunda here? 27 Ndizo Petro wakakanidzaze, paripo jongwe rakarira.

28 Ndizo vakamukweya Jesu kubva kuna Kaiafasi vecienda naye kumhatso yokutongera: ing'a aci-

mangwanani; avo vemene avazi kupotera mumhatso yokutongera, kuti vasazosipiswa, kwokuti vadye pasika. 29 Ndizo Piratu wakaɓudira kwavari, akati, Ndaa ngeyenyl yomunoitira uyu munhu? 30 Uakapingura, vakati kwaari, Kudai uyu munhu asaita zaka-shata, inga tisikazi kumupira kwouri. 31 Ndizo Piratu wakati kwavari, Mutorenyl imnjimni mumutonge kudai ngezironzo zenyu. UaJuda vakati kwaari, Akutendwi kuti isisu tiuraye munhu nokuti ngouri: 32 Kwokuti rizarisike izwi iro raakaereketa Jesu ecipangidzira kuti unozofa ngokufanyl.

33 Ndizo Piratu wakapoteraze mumhatso yokutongera, afaidza Jesu, akati kwaari, Iwewe uri Mambo wavaJuda here? 34 Jesu wakapingura Unodziereketa ici here nokuti vamneni vakacironzera kwouri ndini? 35 Piratu wakapingura, Inini ndiri muJuda here? Dzinza rako nevapristi vakuru vakakupira kwendiri: cinyini cowakamboita? 36 Jesu wakapingura, Umambo hwangu angohwomunyika muno akadi: kudai umambo hwangu hwaia hwomunyika muno inga dzakandirwira nhunge dzangu, kuti ndisahinwa kuvaJuda: asi zino umambo hwangu auhuri hwomuno akadi. 37 Ndizo Piratu wakati kwaari, Ndizo uri Mambo here? Jesu wakapingura, Iwewe unoronza kuti ndiri Mambo. Dgeiyi ndaa ndakabarwa, nangeiyi ndaa ndakauya munyika, kwokuti ndipupurire gwinyiso: kunyazi ndiani uri wegwinyiso unozwa izwi rangu. 38 Piratu wakati kwaari, Gwinyiso cinyini? Aereketa ici, wakaɓudiraze kuvaJuda, akati

kwavari, Andioni ndaa kwaari. 39 Asi imnjimni muno mutoo wokuti ndisunhurire umne kwomuri ngepasika: ndizo munoda here kuti ndisunhure kwomuri Mambo wavaJuda? 40 Ndizo vakazhambarrara, veciti, Haiwa uyu, asi Baraba. Zino Baraba waia dzongoni.

19 Ndizo apo Piratu wakamutora Jesu, akamucaya. 2 NemaJoni akaruka dzungudza reminzwa, akariisa padera pesoro rake akamupfekesa ngeguwe yakatsukuruka; 3 Akauya kwaari akati, Caggamire, Mambo wavaJuda! Nao akamurova ngorupi. 4 NaPiratu wakaɓudaze, akati kwavari, Ringirai, ndinomubudisa kwomuri kuti muzie kuti andioni ndaa kwaari. 5 Ndizo Jesu wakaɓuda, akapfekeswa dzungudza reminzwa, nenguwe yakatsukuruka. Piratu wakati kwavari, Ringirai uyu munhu! 6 Ndizo apo vapristi vakuru, nevatumgamiriri vamuona, vakazhambarara, veciti, Mukohomere, mukohomere. Piratu wakati kwavari, Mutorenyl imnjimni mumukohomere: ngokuti andioni ndaa kwaari. 7 UaJuda vakamupingura, Tinecironzo, ngecironzo ici kunosisa kuti afe, ngokuti iye wakadziita Mukororo waMjari. 8 Ndizo apo Piratu azwa izwi iri, wakapinda kutya. 9 Wakapoteraze mumhatso yokutongera, akati kuna Jesu, Unombobva pari? Asi Jesu aazi kumupingura. 10 Ndizo Piratu wakati kwaari, Aundipinguri here? Auzii here kuti ndinesimba rokukusunhura, neni ndinesimba rokukukohomera? 11 Jesu wakamupingura, Aunga anesimba padera pangu kuti usikazi kuripu-

wa recibva mudenga: ndizo uwo wakandipira kwouru unokushaisha kwakapinda kukura. 12 Dgesure kweizi Piratu wakatsaka kuti unggamusunhura: asi vaJuda vakadaidzira, veciti, Kuti ukasunhura uyu, auri shamjari yaKesari akadi: nokunyati ndiani unodziita Mambo unoereketa kumukira Kesari. 13 Apo Piratu azwa aya mazwi wakamubudisa Jesu kubanzi, wakagara pacigaro cokingera ndaa, pandau inozwi yakagangatwa mapuwe, asi ngokweciHeberu inozwi Gabata. 14 Kwaia nguva yokunasirira pasika kuno ngaawa recitanhatu: naye wakati kuvaJuda, Ringirai Mambo wenyu! 15 Ndizo vakadaidzira, Mudusenyi, mudusenyi, mumukohomere. Piratu wakati kwavari, Ndokohomera here Mambo wenyu? Uapristi vakuru vakapingura, Isisu atina mambo ega Kesari. 16 Ndizo iye wakamupira kwavari kuti akohomerwe. Navo vakamutora Jesu: 17 Naye wakabuda ecitwara mucinjiko kunda kundau inozwi Dehenya, iyo inodaidzwa ngokweciHeberu, Gorogota, 18 Apo ndipo pevakamukohomera, pamnepo nevairi vannahani, umne ngeino, noumneni ngelyo, naJesu ngepakati. 19 Napiratu wakanyoraze cinyoro akacilisa padera pomucinjiko; uku ndikwo kunyorwa kwaco, JESU WENAZARETA MAMBO WE-UAJUDA. 20 Ndizo ici cinyoro cakadzidzwa ngevazhinji vavaJuda; ngokuti ndau iyo yaakohomerwa Jesu yala pasinde nedoropa: naco inga cakanyorwa ngokweciHeberu, nokweciRoma, nokweciGrek. 21 Ndizo vapristi vakuru vevaJuda wakati kuna Pira-

tu, Usanyora kuti, Mambo wevaJuda, asi kuti iye wakati, Ndiri mambo wevaJuda. 22 Piratu wakapingura, kuti, Cendanyora, ndanyora.

23 Ndizo majoni apo ainga akohomera Jesu, akatora zokufuka zake, akazipaura kuita mirwi mirongomuna kujoni rimne ngarimne murwi waro; nehanzu yakeze yainga isina musono, asi inga yakarukwa kubvira ngedera kwayo metsa urebu hwayo hweshe. 24 Ndizo akaereketisana pakati pavo, eciti, Tisaibaura, asi ngatiringidzire hakata tione kuti ngeyani: kuti cinyoro cizarisike, cinoti, Ukakoanisirana zokufuka zangu pakati pavo, nehanzu yangu yakaringidzirwe hakata. Ndizo majoni akaita izi. 25 Asi inga kwa kaemapo pasinde pomucijiko waJesu mai ake, nahurwani amai naMaria, mukadzi waKropasi, naMaria Magadarene. 26 Ndizo Jesu aona mai ake nomudzidzi uwo waaida veciema pasindepo, wakati kuna mai ake, Dzimai, wona mukororo wako! 27 Ndizo wakati kuna mudzidzi uwo, Wona mai ako. Kubvira ngeawa iro uwo mudzidzi wakavatora kuti vagare kanyi kwake.

28 Sure kweizi Jesu ecizia kuti zino zeshe zaiinga zaperera kuti cinyoro cizarisike, wakati, Nopera ngenyota. 29, Ndizo kwakaiswa apo ndiro yakazara ngevini, rairungura, navo vakaisa dangapxizhi rakazara ngevini rairungura pahisopi, vakariisa pamuromo wake. 30 Ndizo apo Jesu ashira vini rairungura wakati, Zopera, wakakotamisa soro rake wakafa.

31 Ndizo vaJuda, ngokuti rala zuva rokunasirira pasika, kwokuti miiri isagara iri pamucinjiko ngezuvu resabata, ngokuti iro zuva resabata rala zuva guru, vakakumbira kuna Piratu kuti mirenje yave igurwe, nokuti vaduswepo. 32 Ndizo majoni akauya, akagura mirenje yowokutanga, neyo unhani, avo vakakohomerwa naye: 33 Asi apo aguma panaJesu, akaona kuti ingaafa, aazi kugura mirenje yake, 34 Asi umne wemajoni, wakabaya rutii rwake ngomukondo, paripo kwakabuda ngazi nemvura. 35 Nouwo wakazona wakaita capupu, noucapupu hwa ke hune gwinyiso, nouyu unozia kuti unoereketa gwinyiso, kwokuti imnjimni mutende. 36 Ngokuti izi zakaitika kuti cinyoro cizarisike, cinoti, Godo narimne rake arizogurwi. 37 Necinyoro cimnenize cinoti, Uanozomuringira, uwo wevakabaya.

38 Ngasure kweizi Josefa we-Arimatia, ari mudzidzi waJesu asi ngokufishika ngokutya vaJuda, wakakumbira kuna Piratu kuti unga dusa muiri waJesu: naPiratu wakamutendera. Ndizo wakauya akadusa muiri wake. 39 NaNikodemusize wakauya, uwo wakauya kwaari pakutanga usiku, eciunza mutombo wakaita mvemve wemure nowemuaro uremu hwawo hwaia mapauli ari zana. 40 Ndizo vakatora muiri waJesu, vakauputira ngejira rorukangaza pamnepo nomutombo wemaka, kudai ngomutoo wevaJuda wokuika. 41 Zino kwaipo munda pandau iyo yaakakohomerwa, nomumunda uwo mnaia neifa idza risikazi kumboikwemno munhu. 42 Ndizo

vakaika umno Jesu ngokuti rala zuva rokunasirira revaJuda; ngokuti iba iro rala pasindepo.

20 Zino ngezuvu rokutanga reviki ngesure kwesabata wakauya Maria Magadareni mangwanani kucakasha kuifa, wakaona buwe rakamburumbudzwa kubva paifa. 2 Ndizo wakarumba akaguma kuna Simoni Petro nokuno mudzidzi umneni uwo waaida Jesu, akati kwavari, Uakadusa Mambo kubva muifa, nesu atizii pevakamuradzika. 3 Ndizo Petro wakabuda noumneni mudzidzi vakaenda kuifa. 4 Zino vakarumba vari pamnepo: mudzidzi umneniwo wakapindira Petro, naye wakatanga kuguma kuifa. 5 Ecikotama pashi, wakaringira mukati, akaona macira orukangaza akaradzikwa, asi aazi kupindemno. 6 Ndizo Simoni Petro wakagumawo, ecimuteera, iye wakapoteramuifa, akaona macira orukangaza akaradzikwa. 7 Neduku iro ralinga rakasungwa musoro mnake risikazi kuradzikwa pamnepo namacira orukangaza, asi inga rakapetwa riri rega pandau inhani. 8 Ndizo wakapoterawo mudzidzi unhani, uwo wakatanga kuguma paifa, naye wakaona, akatenda. 9 Ngokuti inga vasati vazia cinyoro cokuti kunotamika kuti amuke kubva kwevakafa. 10 Ndizo vadzidzi avo vakaenda kanyi kwavo.

11 Asi Maria wakaema kubanzi kweifa ecicema: acacema, wakatotama, akaringira muifa. 12 Naye wakaona ngirosi mbiri dzakafuka zakacena, dzecigara imne ngokusoro, neimneni ngokutsoka,

apo powainga wakaradzikwa muri wa Jesu. 13 Nadzo dzakati kwaari, Dzimai, unocemenyi? Wakati kwedziri, Dgokuti vakadusa Mambo wangu, neni andizii pevaka muradzika. 14 Apo aereketa izi wakakunukukira sure, wakamuona Jesu, akaema, aazi kumuzia kuti ndi Jesu. 15 Jesu wakati kwaari Dzimai, unocemenyi? Unotaka anani? Aye ecipinimidza kuti waia murimi, wakati kwaari, Mambo, kudai wakamufusa kubva pano, ndironzere powakamuradzika, neni ndimutore. 16 Jesu wakati kwaari, Maria. Naye wakakunukuka, akati kwaari, ngorurimi rweci Heberu, Raboni, ukwo kunoti, Mudzidzisi. 17 Jesu wakati kwaari, Usandigwama, ngokuti andisati ndakwira kuna Baba; asi enda kune vanujuna wangu, wooti kwavari, Ndinokwira kuna Baba angu, na Baba enyu, nokuna Mgari wangu, na Mgari wenyu. 18 Maria Magadareni wakauya akaronzera vadzidzi, kuti, Ndaona Mambo, nokuti wakaereketa izi kwaari.

19 Kwakati ngezwa ririro, madelkoni zuva rokutanga reviki ngesure kwesabata, misiwo yakakonyiwa umho mjaia nevadzidzi ngendaa yokutya vaJuda, Jesu wakauya akaema pakati pawo, akati kwavari, Kunyarara ngakua kwomuri. 20 Aereketa ici, waka vapangidza nyara dzake, norutii rwake. Naapo vadzidzi vakadafara apo vaona Mambo. 21 Jesu wakatize kwavari Kunyarara ngakua kwomuri: kudai ngezaakan dituma Baba, ngokudaro ndinomotumawo. 22 Aereketa ici wakavafemera, akati kwavari, Ashi-

rai imnjimni Mjeya wakacena. 23 Nokunyati ndiani vomunozorekerera zishaishi zawo zinozorekererwa kwavari, nokunyati ndiani vomusikazorekereri avazorekererwi.

24 Asi Tomasi, umho wegumi navairi, uwo unozwi Manyambiri, wainga asiri nawo apo Jesu akauya. 25 Ndizo vadzidzi vamneni vakati kwaari, Takamuona Mambo, asi iye wakati kwavari, Kuti ndisaona munyara dzake mauri ezipikiri, ndipfekemho cinwe cangu mu mauri ezipikiri, ndipfeke nyara yangu parutii rwake, andizo tendi.

26 Dgesure kwemazuva masezeze, vadzidzi vaia mukati, na Tomasi wala nawo: Jesu wakauya, misiwo inga yakakonywa, wakama pakati pawo, wakati, Kunyarara ngakua kwomuri. 27 Ndizo wakati kuna Tomasi, Tambanudza cinwe cako uone nyara dzangu, utambanudze nyara yako uipfeke parutii rwangu, usaita usikatendi, asi, unotenda. 28 Tomasi wakapingura, akati kwaari, Mambo wangu, Mgari wangu. 29 Jesu wakati, kwaari, ngokuti wandiona, wazotenda; vanomucena avo vate nda vasikazi kuona.

30 Ndizo mioniso imneni mizhinji yaakaita Jesu mukuona kwevadzidzi vake, isikazi kunyorwa mutsamba iyi: 31 Asi iyi yakanyorerwa kuti imnjimni mutende kuti Jesu uri Kristu, Mukororo wa Mgari, nokuti ngokutenda muano kupona ngezina rake.

21 Dgesure kweizi Jesu wakadzzipangidza kuvadzidzi vake, vari paruanhle rwe Tiberiasi; naye wakadzzipangidza ngenjira iyi.

2 Uaia vari pamgopo Simoni Petro, naTomasi, unozwi Manyambiri, naNatanaeri, uwo waibva Kana re-Garire, nevana vaZebedi, nevamgeni vairi vevadzidzi vake. 3 Simoni Petro wakati kwavari, Ndinnoenda kwootupira hove. Wakati kwaari, Nesu tinoendawo newe. Uakaenda, vakakwira mungarava, ngouhwo usiku avazi kubata ciro. 4 Asi apo kwoita mambakwedza, Jesu wakaema pahumbikumbi: kanihai vadzidzi avazikuzia kuti ndiJesu. 5 Ndizo Jesu wakati kwavari, Uana munaco here cokudya? Wakamupingura, Haiwa. 6 Wakati kwavari, Kandirai rutaa ngokurutii rwokumudyo rwengarava, nemnji munozoona. Ndizo vakarukandira kudaro, ingavasina simba rokurukweya ngendaa yokuwanda kwehove. 7 Ndizo mudzidzi uwo waaida Jesu wakati kuna Petro, NdiMambo. Ndizo Simoni Petro apo azwa kuti ndiMambo, wakasimira jira rake, ngokuti waia mupunu wakadzikandira muruandhle: 8 Asi vadzidzi vamgeni vakauya vari mumukumbi, ngokuti vaia vasiri kuretu nenyika, asi kunonga makubiti arimazana mairi, vecikweya rutaa runehove. 9 Ndizo apo vaguma kuhumbikumbi vakaona apo muriro wemasimbe, nehove yakaradzikwa padera pomuriro, necingwa. 10 Jesu wakati kwavari, Unzai kubva kune hove dzemngabata zino. 11 Simoni Petro wakakwiramno akakweya rutaa kuhumbikumbi, rwakazara ngehove huru dzaiemno dzirizana nemakumi mashano nenhatu: nokunyati dzaia zhinji kudaro, rutaa aruzi kubauka. 12 Jesu wakati kwavari, Uyai mudye. Apana

noumnye wevadzidzi waishinga kumubvunza, kuti Uriani? vecizia kuti ndiMambo. 13 Jesu wakauya, akatora cingwa, akavapa, nehove ngokudaro. 14 Zino iyi yaingya yaanguva yecitatu yaa-kadzipangidza Jesu kuvadzidzi, ngesure kwokumuka kwake kwevakafa.

15 Ndizo apo vaingya vadya, Jesu wakati kuna Simoni Petro, Simoni mukororo waJoani, unorudo here kwendiri kupinda apa? Wakati kwaari, Eya, Mambo, unozia kuti ndinokuda. Wakati kwaari, Fudza vana vemakwai angu. 16 Wakati kwaarize ngokwecipiri, Simoni, mukororo waJoani, unorudo here kwendiri? Wakati kwaari, Eya, Mambo, unozia kuti ndinokuda, wakati kwaari, Usha makwai angu. 17 Wakati kwaari ngokwecitatu, Simoni, mukororo waJoani, unondida here? Petro wakakurudzwa mnyoyo ngokuti wakati kwaari ngokwecitatu, Unondida here? naye wakati kwaari, Mambo, iwewe unozia zeshe, unozia kuti ndinokuda. Jesu wakati kwaari, Fudza makwai angu. 18 Zirokwazo, zirokwazo, ndinoti kwouri, Apo uciri mutsa, waidzisimidza, wechamba kuende powaida: asi apo wazoa musharuka, unozotambandza nyara dzako, noumgeni unozokusimidza, nokukuendisa, poukadi. 19 Wakaereketa ici ecipangidzira kuti injira yakaitawani yaizofa uwo ndiyo kuirikidza Mhari. Apo aereketa ici, wakati kwaari, Nдитеere. 20 Ndizo Petro ecikunukukira sure, wakaona mudzidzi uwo waakada Jesu, ecimuteera, aye waingya akatseama paditi rake mukudya kwemadeikoni, u-

woze wakati, Mambo, ndiani unozokupira? 21 Petro ecimuona, wakati kuna Jesu, Uyuke, unozoitenyi? 22 Jesu wakati kwaari, kudai ndecida kuti agare metsa ndiuye, unenyi naco iwewe? Ndi-teere. 23 Ndizo iri izwi rakabudira mukati mnevakoma, rokuti uyu mudzidzi aazofi: asi Jesu aazikuronza kwaari, kuti aazofi, asi kuti, Kudai ndecida kuti agare

ndimetse ndiuye, unenyi naco iwewe?

24 Uyu ndiye mudzidzi uwo unopupura ngeizi ziro, nowakanyora izi: nesu tinozia kuti ucapupu hwake ngohwe gwinyiso.

25 Ziripo zimneni zizhinji zaakaita Jesu, kudai zakanyorwa cimne ngacimne cazo, ndinoti pamneni nenyika yemene aingae-neri tsamba dzinganyorwa.